

青照堂叢書二編

臺灣志畧



07183

青照堂叢書

劉振瀾

纂梓 男維翰 校錄

臺灣志畧

一朝邑

李元春

輯

男來南 纂訂

地志

臺灣在福建布政使司東南大海中自泉州同安之

廈門亂流經澎湖抵鹿耳門至治計水陸程一千二

百六十里

陸自省城五百四十里至同安又六十里至廈門自廈門至澎湖水程七更自澎湖

至臺灣水程四更舊志以六十里爲一更則六百六十里

爲古荒裔地不入版圖

元之末於澎湖設巡檢司以隸同安中國之建置於

是始

朱景英海東札記云文獻通攷琉球國居海島在泉州之東有島曰澎湖水行五日而至隋大

青照堂叢書

三編

臺灣志畧一

一

注俱錄原誌

業中曾令羽騎尉朱寬入其國取布甲而歸時倭國使來朝見之以爲夷耶久國人所用旁有毗舍耶國

語言不通袒裸野野殆非人類宋淳熙中其酋豪嘗率數百輩猝至泉州水濱圍頭等村多所殺掠喜鐵

器掠取門環及劍甲取鐵臨敵用鏢鏢以繩千餘丈爲操縱蓋愛其鐵不忍棄論者疑其情狀相似以臺

灣卽毗舍耶國其兄信歟又有據名山藏乾坤東港華嚴婆娑洋世界名爲鷄籠之說指爲今臺灣恐亦

影響譚耳至海防攷有隋開皇中遣虎賁陳稜疏球湖三十六島郡志據之語尤可疑攷隋書陳稜疏球

之役在大業中而本傳亦無畧澎湖三十六島之詞獨不解當日談海防者何所據而云云也 明洪

武五年信國公湯和畧海上盡徙澎湖民置漳泉閩

廢巡檢司而墟其地嘉靖四十二年流寇林道乾導

倭人掠近海地都督俞大猷征之迨至澎湖道乾走

臺灣大猷以水道險遠法不輕進於是留偏師駐澎湖以哨鹿耳道乾困走占城乃罷澎湖偏師而復設巡檢尋亦廢萬歷閒增設澎湖遊兵尋復增衝鋒遊兵爲備倭故於是澎湖常爲駐防之所萬歷末年荷蘭據臺灣築城於一鯤身之上曰臺灣城臺灣之名於是始天啟二年荷蘭據澎湖又城焉天啟五年海寇顏思齊入臺灣鄭芝龍附之而荷蘭之據臺灣自若思齊引倭奴剽掠海上與荷蘭共有臺灣之地以爲巢穴又所部屬多中土人中土人之入臺灣自思

青照堂叢書

三編

臺灣志畧

二

齊始時芝龍弟芝虎亦爲海寇並附思齊思齊死賊衆立芝龍爲長於是鄭氏遂有臺灣之地崇正元年芝龍率所部降於督師熊文燦然猶遷延海上也

國朝順治三年秋八月平閩芝龍乃就撫芝龍既降而荷蘭盡得臺灣之地順治十八年芝龍子成功以江南敗歸襲澎湖夏五月入臺灣逐荷蘭冬十有二

月荷蘭歸國成功改臺灣城爲安平鎮以今縣治爲

承天府

南北路設縣二  
曰天興曰萬年

總臺地曰東都康熙二年夏

五月成功死子經嗣改東都爲東寧

二縣爲二州設  
南北路澎湖安

撫司二十年春正月經死子克塽嗣是年福建總督姚啓聖計招僞賓客司傅爲霖爲內應事洩爲霖輩選害啓聖仰遵

廟算定平臺策二十二年水師提督施琅統師專征夏六月癸亥大戰於澎湖克之秋七月丙申鄭克塽降於我八月壬子

王師至臺灣於是琅疏請留臺灣爲外蔽

詔報可二十三年 廷議設臺灣縣隸臺灣府爲附

郭雍正五年增設澎湖廳而臺灣之建置駸駸乎盛

青照堂叢書

三編

臺灣志畧

三

矣

臺灣縣東負山西面海邑治之境東至龍山寺西至海岸南至府儒學南北至城守營北縱橫徑五里而遙所轄東至羅漢門莊外門七十里

乾隆四十九年  
臬司楊廷樞勘

定

其東曰內山北至新港社新港溪二十里北爲嘉

義南至文賢里二贊行溪二十一里南爲鳳山西盡

海岸三里入于海海西南至安平鎮七里

陸自七鯤  
身有路可

至計二十里 西北至鹿耳門三十里又西北至黑水小洋

其西隸澎湖幅員南北袤四十一里東西內廣七十

三里其外東不盡內山西不盡海

臺灣地入東海在禹貢揚州之徼外其星野無考前

志謂地隸閩宜從閩以附于揚州其星野屬牛女星

紀之次其辰在丑据僧一行曰星紀當雲漢下流百

川歸焉其分野下窮南紀之曲東南負海為星紀陳

氏元麟曰按古四譯館外彙來貢以外彙分方紀星

臺灣屬島夷分野在鶉尾之次其辰在巳與呂宋曰

本同占整臺灣值翼九度据宋天文志云鶉尾在翼

軫之交居南方七宿之末隨南極而半入海呂宋沒

青照堂叢書

三編

臺灣志畧一

四

水臺灣是也利瑪竇云鶉尾之次於律仲呂岡山分

諸家分野之說本不可據

野臺有大

二說者其言各殊然皆依附離合之見無

實驗云

東倚者皆山西控者皆海山渡海而來則以為發源

乎福州東汨乎鼓山

赤散筆談云宋朱文公登福州鼓山占地脈曰龍渡滄海五百

年後海外當有百萬人之郡

示嚮乎五虎

福州五虎山入海首

皆東向是氣

見跡乎關潼白猷而結腦乎大雞籠舊

云臺灣山脈自福州五虎門磅礴入海東至大洋中

矣起二山曰關潼曰白猷復渡重洋至淡水結腦為大雞籠南行數百里至郡治彼堂堂兀兀以去者且不

知其所之也

或云呂宋地脈發於臺灣

然山渡乎海其盤旋屈曲

垂乳結穴可造郡邑聚村落者必西向內地而復歸於海水出于山其可舟可游可灌可汲以養吾民者必西流而卒歸於海豈地理之所存顧有不忘其本者歟今居斯土者官則受

國恩銜

王命而至

君門萬里臣心凜凜視同咫尺民則農商富庶必念食毛踐土之惠以毋忘首邱之仁反是者不祥蓋觀

青照堂叢書

三編

臺灣志畧一

五

諸地理則有斷斷然者地理卽天理亦卽人道也邑區區數十里則有專脈注結者有別派分支羅列拱衛且有蜿蜒游行過境以去者蓋自番會雜居箐篁叢翳士大夫終不肯裹糧犯霧露爲奇巖秀石之評樵夫獵戶過之而不能名名之而不能書故不知名者蓋夥名之矣而游移彷彿所聞異詞指東詭西以此易彼舊志所稱差謬殊甚以其所可知者書之名號雖殊而山川不改道理之遠近可約而知南北東西方面不可易也談地理者要以天道人事爲斷

大鳥山在邑東北百里而遙郡垣之祖山也山勢西南行十餘里而高聳秀拔者爲分水山稍下又西行爲分水崙崙南北兩石峯蒼翠秀削翼之以行緣崙皆結細石產青草磈礪嫩綠崙南北皆良田美石無坑塹崙左之水南趨羅漢內門崙右之水北入木崗山溪以出大穆降

此水入溪西落則木崗山之脈已隔舊志謂木崗山爲郡少祖可知

其崙西行二十餘里顧盼逶迤欲收仍縱前起巨阜曰草山

以多茅草故名

則郡垣之少祖山也南北復有兩高峯翼之以行峯多石勢甚雄偉西行列屏障自北而

青照堂叢書

三編

臺灣志畧一

六

南橫亘數十里則爲內大鳥山

此在郡城背後爲第三重屏障

踰山

西南孤峯突起者曰一峯尖峯皆大石石壁高可數

丈下有石井水清而甘環山居人數家皆食焉由是

西下伏而起起而伏如是者三曰三凸崙迤崙西行

八峯平列于前自南而北連亘二十餘里如開樓窗

如展鏡屏每天清氣霽倚窗窺屏遠見紅毛樓故昔

人名之曰蟻鏡窗八峯者復有專名最南第一峯曰

天馬第二峯獨高大石屏如豎鏡則獨以蟻鏡屬之

北第三峯曰飛鷲巢又北曰猴晒日又北曰接雲又

北曰山猪路北爲樟仔壁極北曰尾峯終焉此郡城第二重

屏障也自第二峯曠鏡西下二十餘里至老鷓嶺中間

南北諸峯星羅碁布蠶叢魚鳧游衍錯落多不知名

而自老鷓嶺西下又二十里則結凹腦曰馬鞍山其

西爲香洋香洋西面二十餘里平疇曠衍溝塍繡錯

襍植成雲春夏之交可以觀禱舊志以爲八景之一

者由是而西小阜嶽崎綿亘錯互若坡若隴南北迢

迢二十餘里橫爲郡城之背者曰嵌頂山此郡城第一重屏障

嵌頂西上五里許爲大東門

青照堂叢書 三編 臺灣志畧一 七

番仔湖山在大烏山西北距城八十里亦東北最高

山也其西爲剛仔林大尖山又西爲小尖山皆極危

峻人不可行又西下爲左鎮山左鎮北踰溪爲木岡

山木岡西下爲卓猴山卓猴踰溪西南爲猪母耳山

又南爲柳仔林山皆邑之右肩也又南爲鑿裏山鑿

裏北踰溪爲草潭山又西北爲大坵田山大坵田西

爲湖仔內山則邑右臂之拱衛也

內烏山在分水崙之南者直趨南路其分支者東趨

羅漢內門西落脈爲上崙石屏山其南則翁仔上天

山稍西爲雁門關前志所謂雁門煙雨者是也舊路由此入內門今崩陷不可行雁門之西爲土樓山亦曰險山門徑甚險惟容一人一騎亂時人爭逃之扼其險賊不能至下有太平社故亦名太平山西南爲茅草埔山皆邑之左肩也又南爲狗圍山則左肩之外輔又西北爲戶椴嶺又西北爲灣崎山又西北爲虎頭山又西北爲猴洞山則邑左臂之拱衛也

魁斗山在邑城南其脈自東南來至正南陡起三峯狀若三台星爲府學文廟拱案又蟠屈蜿蜒以至西

青照堂叢書

三編

臺灣志畧一

八

南勢若內抱形家所謂下砂者是也邑來脈甚長而所謂下砂者止此

羅漢內門在邑東南六十五里其地四壁皆山中開平疇東西可二十餘里南北可三十里以形家之說較之則邑之庫藏也其山自東北來者上接大烏山層巒疊翠邑人不知其名內門東北設木柵則稱之曰木柵後大山疑卽舊志所紀目眉嶺山者是也山之南高峯峭出曰蘇遠埔嶺踰嶺而南有湖曰內湖又其南曰外湖湖之西曰燒灰山其東曰石門山下

有坑曰石門坑石門之南爲赤竹嶺嶺東爲三峯崙南爲小東方木山小東方木連峯委折而南踰萊公坑口高聳而起者爲大東方木山則內門之正東山也東之東重岡複嶺高入雲際北接嘉義南抵鳳山亘數十里爲邑之後屏者則曰南馬仙山大東方木之南巨石踞溝流叢石結山甚高其上爲大葉林山山南爲龍潭山西下有潭曰龍潭龍潭山南曰金交椅其南爲大崎越嶺又其南爲鼓山則出羅漢外門焉

以上爲內門東壁故山皆南行

鼓山所處極內門之東南由是山

青照堂叢書

三編

臺灣志畧一

九

勢折而西行始折而隆起者曰將軍山山之西紆徐軒伏不數里而疊秀可望者曰銀錠山則內門之正南山也又西而至于打鹿埔溪口止焉

此爲內門之南壁山皆西

行

銀錠之南自東徂西亘數十里爲南壁之外屏者

曰外烏山其南則獐仔壁山大傑巔山皆在焉外烏

之東高聳可數者曰南麻蓼山尖山大岡山小岡山

則界於鳳山矣

此爲南壁外屏

內門之北則全倚分水崙無

仙山分水崙西行至內烏山而盡則內門北境之山

亦盡焉

此爲內門北壁

內烏旣橫亘數十里則自分水崙以

南爲內門之西壁其分支落崙皆東趨于內門南踰  
蝦蟇林山至溪口終焉此爲西壁羅漢外門其地在內門

之東復轉而繞內門之南畧如曲尺然其在東者中  
有淡水大溪溪流自北而南溪東卽南馬仙山東之

南爲旗尾山誌所謂旗尾秋蒐者鳳山界也溪西迤

內門東壁之外自三峯崙東方木以南至鼓山則與

旗尾山東西相對中爲番薯寮街自鼓山西折始繞內門之

南過將軍山北緣內門南壁之外南迤外烏山以西

則有虎仔山大傑巔山獐仔寮山其東則大小岡山

青照堂叢書

三編

臺灣志畧一

十

尖山南麻蓼山皆鳳山界

七鯤身巽在邑西南海中脈自東南而來西轉下海

聯結七巘相距各里許接續不斷勢若貫珠自南以

北而終於安平鎮與南北汕參差斜對爲邑之關鎖

地皆沙土風濤鼓盪不崩不蝕多產蒜茶枕椰望之

鬱然蒼翠泉九甘美一鯤身地最廣卽安平鎮紅毛

舊城在焉今水師營駐於此有居民街市二鯤身至

七鯤身居者多漁戶每斜陽晒網笞簪家家煙月蒼

茫漁燈明滅佳景如披圖畫

鹿耳門嶼在邑西北三十里大海中浮沙橫亘形如鹿耳尾迤南爲四草嶼首枕北爲鹿耳門鹿耳門之北有嶼曰北線尾亦沙嶼橫亘與鹿耳門南北遙接中隔大港曰隙仔港港之中有石礁在水底北線尾旣稱北汕鹿耳門亦稱南汕隙仔港中石礁所以暗接南北二汕故港雖大而水淺徑狹舟必插標以行觸礁則船立碎北線尾之北有沙汕曰加老灣汕稍小於北汕而不堪泊舟又其北曰海翁汕則自北路而來迢迢百餘里在縣境之外矣

青照堂叢書

三編

臺灣志畧一

十一

德慶溪

俗呼坑仔底

源出小東門外舊萬壽宮前入郡城

東安坊合舊縣署後并府署東二泉西流經縣署右至水仔尾北廠入于臺江

福安坑源出小南門內經寧南坊府學宮前西流至塗墘入于臺江

臺江在邑治西門外汪洋溇溇可泊千艘南至七鯤身北至諸羅蕭壠茅港尾內受各山溪水外吞大海鑿裏溪源出鑿裡東南內山經香洋之北西出爲鑿裡溪又西爲舊社溪又西北與咬狗溪合流西入于

許寬溪

咬狗溪源合鑿裏草潭諸山之水西與舊社溪合流  
又西爲許寬溪

許寬溪源合舊社咬狗諸溪之水西流受鯽魚潭之  
水又西北受大坵田湖仔內諸山之水西入于蔦松  
溪

蔦松溪在縣治北五十里爲許寬溪鯽魚潭之下流  
又東北受大穆降之水西入臺江注于海

左鎮溪源出分水山之北西北受岡仔林大小尖諸

青照堂叢書

三編

臺灣志畧一

十一

山之水西經左鎮之南又西流爲新圍溪

新圍溪源接左鎮溪西流受大穆降諸溪之水又西  
北與本藩溪合流西下爲新港溪入于臺江注于海  
本藩溪源出岡仔林之北西流經木岡山之南爲木  
岡溪又西出左鎮卓猴之間又西與新圍溪合流爲

新港溪入于臺江注于海

新港溪北  
爲嘉義界

卓猴溪源出卓猴山北流入于曾文溪

嘉義  
界

分水溪源出分水山之南經水蛙潭南流至羅漢門  
東受石門坑東方木諸山之水西受石車崙茹荖崙

者羅漢內門山諸山之水滙爲長潭清瑩可鑑西走出內門

過狗圖圈西下北受灣崎溪水西流爲岡山溪又北

受打鹿洲溪水西流爲角帶圍溪又受紅毛寮溪水

西流爲二贊行溪又西爲喜樹港入于臺江注于海

灣崎溪源出三凸崙南流過狗圖圈入于岡山溪

打鹿洲溪源出馬鞍山西南流經打鹿洲北受深坑

仔水復南流入于角帶圍溪

紅毛寮溪源出紅毛寮南流入于二贊行溪溪南爲鳳山界

浚水溪自北而南橫絕郡治之背源出自諸羅內山

青照堂叢書 三編 臺灣志畧一 十三

其來極遠至羅漢門東方木東受小溪水經旗尾山

西下繞鳳山縣東南至東港西入于海

石頭溝在邑治東北三里許無水源受東北衆坡之

水經海會寺前轉邑治北大橋港出柴頭港西入臺

江

鹿耳門港亦名隙仔港舊志另作隙仔港誤在南北二汕之間

水底皆沙縱橫布列舟不可犯就其稍深處覓港出

入港路窄狹僅容兩艘潮長時水可丈四五尺潮退

時不能一丈舟懸後舳而進其紆折處必探視深淺

盤辟而行而沙水相盪深淺又時變易必插竹標以識南白北黑名曰盪縷初設五桿後增設十三桿初近北汕以入爲舊港今近南汕而入爲新港

加老灣港在北汕北不堪泊舟西南卽大洋其北卽海翁汕港口大澳曰海翁窟亦名月眉灣可泊百艘安平鎮大港在臺江西南赤嵌城之西紅毛時巨舟悉從此入泊于臺江自鄭成功由鹿耳門入臺後遂淤淺今惟南路貿易之船經此巨舟不得入矣

潭在永康長興廣儲西三里之界滙納衆流修而不  
青照堂叢書 三編 臺灣志畧一 四

廣計長可二十餘里多生鯽魚年有徵稅三用之內田資灌溉亦名龍潭旱時禱雨於此又名東湖最宜霽月舊志以爲八景之一

菅林潭亦名嵌下陂在長興里地勢洿下泉流所歸里衆築堤障之以資灌溉屢有爭競康熙五十七年太守王珍勘明勒石定其限焉其水北通鯽魚潭

無源潭在永豐里潦水所鍾也草潭白衣潭鄭氏鑿也荷蘭陂紅毛築也公爺陂鄭氏築也皆在新豐里甘棠潭在保大東里地多甘棠王有潭在仁和里

民王有所鑿蓮花潭其源甚深多產紅白芙蓉鴛鴦  
潭雨潭比偶如鴛鴦然水漆潭多生水漆參若陂紅  
毛時佃民王參若築十嫂陂寡婦王十嫂募佃築陣  
仔頭陂僞鄭時築月眉池形如半月也皆屬文賢里  
鼎濟窪在新港社產魚蝦新港東陂在新化里西陂  
亦在新港社

邑治八景曰鹿耳連帆曰鯤身集網曰赤嵌夕照曰

金鷄曉霞

此屬澎湖

曰鯽潭霽月曰鴈門煙雨曰香洋春

耨曰旗尾烁菟

散見山水古蹟各志自御史錢琦以下皆有題咏

又郡八景

青照堂叢書

三編

臺灣志畧一

五

曰安平晚渡沙鯤漁火鹿耳春潮雞籠積雪

此屬淡水

溟曉日

同上

西嶼落霞

屬澎湖

澄臺觀海斐亭聽濤

俱在道署

內自巡道高拱乾以下皆有題咏

秀峯塔居郡學之巽方高丈三尺五寸底周六丈四

門階級空其中乾隆六年提學楊二酉建後廢不修

治

南湖書院在小南門外乾隆三十年郡守蔣允焄以

崇文書院狹且近市復建書院於此闢齋舍設講堂

於法華寺之左卽舊夢蝶園處也其地有湖山林木

之勝後以院長居此者多弗康遂廢

又有正音書院在東安坊舊縣署之左雍正七年建  
尋廢

環臺灣皆海自邑治計之南至鳳山縣之沙馬磯頭

旱程二百九十六里水程七更北至淡水廳之雞籠

鼻頭山旱程六百三十里水程一十九更西北至鹿

耳門水程二十五里

康熙五十五年  
欽差丈量  
依旱程折算僅十里零七繩

鹿

耳門西北至澎湖水程四更約一百八十里澎湖西

北至廈門水程七更約三百里邑治內優大山之東

青照堂叢書

三編

臺灣志畧一

六

曰山後歸化生番所居舟從沙馬磯頭盤轉可入卑  
南覓諸社山後大洋之北有與名釣魚臺可泊巨舟  
十餘艘崇爻山下薛波蘭港可進三板船海洋行舟  
以磁爲漏筒如酒壺狀中實細沙懸之沙從筒眼滲  
出復以一筒承之上筒沙盡下筒沙滿更換是爲一  
更每一日夜共十更每更舟行可四十餘里而風潮  
有順逆駕駛有遲速以一人取木片赴船首投海中  
卽從船首疾行至船尾木片與人行齊至爲準或人  
行先木片至則爲不上更或木片先人行至則爲過

更計所差之尺寸酌更數之多寡便知所行遠近所至地方若島嶼可望令望向者曰亞班登桅遠望如無島嶼可望則用綿紗爲繩長六七十丈繫鉛錘塗以牛油墜入海底粘起泥沙辨其土色可知舟至某處其洋中寄旋候風亦依此法倘鉛錘粘不起泥沙非甚深卽石底不可寄泊矣通洋海舶掌更漏及駛船針路者爲火長一正一副各有傳抄海道秘本名曰水鏡臺廈重洋往來之舟水程頗近中有澎湖島與相望不設更漏但焚香幾行爲準針路則以羅盤

青照堂叢書

二編

臺灣志畧一

七

按定子午自臺抵廈向乾方而往自廈抵臺指巽方而來若由廈北赴江浙綿蓋諸州南抵廣粵惠潮各府沿海傍山逐日皆有坡澳可泊不用更漏筒或問舊志舟行一更六十里今謂四十餘里何也曰南路沙碼磯頭至府治舟行七更康熙五十五年 欽差丈明早程二百九十六里水程與旱程相傍是一更該四十二里有零通志載福州至琉球水程一千七百里府志稱船行四十三更是亦一更四十里矣又問舟自南路抵府七更順風一日可至自廈抵澎亦

七更必一日有餘乃至何也曰臺海潮北汝南路  
抵府順流也臺廈橫流故稍遲曰北流爲順南流不  
逆乎曰有風不怕流南流雖逆非如黑溝之湍激也  
又問舟中定更以人行與木片齊至爲度臺地人行  
窮日不能百里舟行乃二百餘里何也曰投木片時  
其行速且船無休息故倍之又問北路水程十九更  
早程僅六百三十里何也曰此未暇詳考依府志所  
載

臺海潮流止分南北臺廈往來橫流而渡號曰橫洋

青照堂叢書

三編

臺灣志畧一

六

自臺抵澎爲小洋自澎抵廈爲大洋故亦稱重洋

凡往內地之舟皆於黎明時出鹿耳門放洋舟人擬  
舫揚帆

出海曰放洋鹿耳門港南北有二礁植  
標以記不敢逼犯贖明見標舟乃可行清明後南風

始發從鹿耳門外徑去白露後北風漸盛必至隙仔

港口在鹿耳門  
外之北方可開駕舟行務依上風故南風放  
洋從南北風放洋從北若

誤落下風  
針路便失約行百里望見東西吉嶼經二巒便抵澎

湖大約後午可到南風宜泊水坡澳北風宜泊網澳

內塹外塹等澳餘詳前澳與內自澎往廈悉以黃昏

爲期越宿而內地之山隱現目前此就順風而言若

南風柔若風不勝帆常一二日夜方抵澎湖至廈門  
則更緩又若北風凜烈帆不勝風摺帆駕馭登岸亦  
稍遲焉

帆往福州望北直去至閩安鎮水程一十五更不用  
灣泊澎湖若從北路浚水西渡水程僅七更登舟半  
日可見闔潼山自闔潼趨定海行大洋中五六十里  
至五虎門兩山對峙勢極雄險爲閩省外戶門外風  
力鼓盪舟帆顛越旣入門靜淥淵渟與門外迥別更  
進爲城頭土名亭頭十里卽閩安鎮再數十里至南

青照堂叢書

三編

臺灣志畧一

九

臺大橋

鹿耳門外初出洋時水色皆白東顧臺山煙雲竹樹  
疊翠浮藍自南抵北羅列一片絕似屏障畫圖已而  
漸遠水色變爲淡藍臺山猶隱現於海面旋見水色  
皆黑則小洋之黑水溝也過溝黑水轉淡繼而深碧  
澎湖諸島在指顧閒矣自澎湖放洋近處水皆碧色  
漸遠則或蒼或赤蒼者若靛綠赤者若熾紅再過深  
黑如墨卽大洋之黑水溝橫流迅駛乃渡臺最險處  
旣過水色依然蒼赤有純赤處是名紅水溝不甚險

比見水皆碧色則青水洋也頃刻上白水而內地兩  
太武山屹然挺出於鷓首矣

南風時駕駛近南先見  
鎮海之南太武北風時

駕駛近北先見  
金門之北太武

黑水溝爲澎湖分界處廣約六七十里險冠諸海其

深無底水黑如墨湍激悍怒勢如稍窪舟利乘風疾

行亂流而渡遲則波濤衝擊易致針路差失

按黑水溝有二

其在澎湖之西者廣可八十餘里爲澎廈分界處水  
黑如墨名曰大洋其在澎湖之東者廣亦八十餘里  
則爲臺澎分界處名曰小洋小洋水比大洋更黑其  
深無底大洋風靜時尚可寄旋小洋則不可寄旋其  
險過于大洋此前輩諸  
書紀載所未及辨也

廈船過黑水溝良久令亞班

青照堂叢書

三編

臺灣志畧一

三

舟中占風望向者  
二人名曰亞班

登桅遙望必見澎湖西與花嶼猶

與乃可前進倘計程應至而諸與不見便失所向須

亟收回恐漂越臺之南北而東則邈不知其所之或

已抵鹿耳門爲東風所逆不得入或遇海吼浪湧隙

仔不可寄泊當回澎湖若值月黑莫辨島嶼何處不

得不仍歸廈門而針路已失徃徃有隨風北至南曰

而上南至銅山以下者

來臺諸舟必以澎湖爲關津由西與頭入泊媽宮等

澳然後出東吉過小洋抵鹿耳其常也或已入澎湖

式海金須辨

而風信未可行嘗有灣泊至旬以外者

澎湖諸島皆平岡無峯巒舟行稍遠輒伏而不見漸近時登鷓尾高處憑眺恍惚天際微雲一抹如線徘徊四顧天水混連孤舟蕩漾若織芥在明鏡中

泛海不見飛鳥則漸至大洋蓋水禽陸棲也近島巖先見白鳥飛翔

海波夜動燄如流火天黑彌爛船在洋中可擊水以視物一擊而水光飛濺如明珠十斛傾撒水面晶光熒熒良久始滅

青照堂叢書

三編

臺灣志畧

三

臺灣縣治之海常吼自七鯤身北至鹿耳門南至打鼓港止小吼似擊花腔鼓點點作搗豆聲乍近乍遠若斷若續臨流聽之有成連鼓琴之致大吼如萬馬奔突如衆鼓齊鳴如三峽崩流如千鼎共沸厥聲遠聞累數日夜罔有閒歇驚濤溢涌舟莫敢近雖錢塘八月怒潮未足擬也或曰風兆時亦不風或曰濤響何港無濤若云雨徵宜其近之謂海氣發故地籟鳴也乃微雨輒吼大雨而或不吼既晴猶吼久旱而亦時吼斯不可解矣惟吼聲南下而漸細則久雨必晴

頗驗按海自嘉義以上不吼惟臺灣下至鳳山則吼俗呼曰做湧驚濤迅發舟觸之沸擊迫岸輒碎  
自岸邊至中流浪之最巨者有三疊約廣不上十里  
以外則漸平春冬不吼惟四月廿六日起舟人謠曰  
湧仔開目不因風兆不因潮次謂海氣一發微雨幾  
發輒吼或大雨不吼大風不吼或既晴猶吼必待烈  
陽安暴至終日則吼息四五之吼鳳山最甚六七  
月之吼臺灣最甚其地氣由南而北七月廿六後謂  
之埔占湧漸輕至中秋則不吼也蓋夏令地  
氣蒸熱自下而升猶煮飯之滾于鍋底然

臺處閩之東南以一郡藩蔽全省卽沿海東西地方  
之對峙者計之北路浚水廳之後壠港與興化府南  
日對後壠而上有竹塹與福清縣海壇鎮對後壠而  
上有南嵌社與福州府閩安鎮關潼對自南嵌至浚

青照堂叢書

三編

臺灣志畧

三

水港與連江縣北菱對自浚水港至雞籠山與福寧  
府沙埕烽火門對南路鳳山縣之彌陀港萬丹港岐  
後港東港茄藤港則與漳州府之古螺銅山等處對  
順風時駕駛針路皆以卯酉爲方向不用斜轉惟鹿  
耳門居邑治之西北澎湖又居鹿耳門之西北與泉  
州府同安縣之廈門東南斜對針路以巽乾爲方向  
邇來海不揚波片艍仔三板頭等小船每由北路策  
港鹿仔港等處乘南風時徑度廈門泉州自東徂西  
橫過澎湖之北名曰透西例禁甚嚴趨險者猶如鷺

也

臺海港口哨船可出入者只邑治鹿耳門及南路打

鼓港北路蚊港笨港淡水港小雞籠八尺門七處其

餘如邑治之大港南路之西溪蠓港蟻港東港茄藤

港放線港冬月沙淤至夏秋溪漲船始可行大崑麓社寮港後灣子

俱瑯嶼地北路之馬沙溝歐汪港布袋澳茅港尾鐵線橋

鹹水港井水港八掌溪猴樹港虎尾溪港海豐港二

林港三林港二港亦多沙汕水退去口五六里鹿仔港潮漲大船可至內汕不能

抵港其外汕水退時去口十餘里非熟港道者不敢出入哨船俱不能常至

青照堂叢書

三編

臺灣志畧一

三

邑治州仔尾隙仔喜樹港南路萬丹港北路灣裡竿

寮舍西篷山港只容舢舨小船再南路岐後枋寮加

六堂謝必益礮艦港大綉房魚房港北路鱸仔空象

領今盡淤塞惟小漁船來往

相傳臺海有萬水朝東處諸書所載不同續文獻通

考及島上坵傳釋海紀遊皆云在澎湖南續文獻通考云水至

澎湖漸低近琉球謂之落深深者水趨下而不迴也

凡西岸漁舟到澎湖以下遇颶風發漂流落深回者

百無一島上坵傳云澎湖風濤噴薄悍怒激門瞬息

萬狀千午稍錯北則墜於南風烈南則入於萬水朝

東皆有不返之憂釋海紀遊云澎湖黑水溝最險自

北流南不知源出何所水黑如墨勢又稍窄廣約百

里湍流迅駛舟師至此喘喘屏息懼或順流而南不知所之

福建海防考謂澎湖

爲漳泉南戶日本呂宋東西洋皆所必經南有港門

直通西洋臺灣志畧謂海船直指南離至東京廣南

占城東埔寨暹羅等處舊府志亦謂子午稍錯南犯

呂宋或暹羅或交趾今通洋之舟歲歲南行未嘗入

於萬水朝東則云在澎湖南者誤也至云水至澎湖

漸低黑水溝自北流南亦誤又漳州府志云溝水分

東西流過溝則東流達於呂宋回日過溝則西流達

於漳泉皆未詳考蓋臺海潮流止分南北潮時北流

青照堂叢書

三編

臺灣志畧一

十四

較緩汐時南流較駛澎島在廈門之東南乃渡臺標  
準但無高峯不可遠望過溝時針路指定東南船稍  
近北雖不見澎島猶可見臺北諸山苟爲南流所牽  
則徑出南路沙馬磯頭之下無島嶼可望不知臺灣  
在何方矣故黑水溝中值靜風潮漲可隨流潮退必  
懸椀停舟非畏萬水朝東也稗海紀遊又云雞籠山  
下竇近弱水舟至則沉或名爲萬水朝東其勢傾瀉  
捲入地底滔滔東逝流而不返二說俱無稽若舊府  
志云北則漂蕩無復人境甚至無力水而莫知所之

亦第想像之詞然則亦故集所云黑水溝驚濤鼎沸  
險冠諸海順流而東則爲弱水昔有閩船漂至弱水  
之東十二年始還中土者皆不可信乎曰弱水見於  
禹貢自有其處萬水朝東天下之公言也地缺東南  
尾閭有焦釜豈卽在雞籠山下且順流而東果爲弱  
水則府志所載外域諸國在臺海正東東南東北者  
將無由而至矣而皆非也

按府志載琉球在臺海正東日本在臺海東北呂宋

蘇祿在臺海東南今考臺海北至雞籠南盡沙馬磯頭而止琉球在福州正東一千七百里自五虎門放洋經雞籠山之北而去日本以近東海日出而名舟必北上抵江南界之秦山花鳥巖始可放洋明史載

青照堂叢書

三編

臺灣志畧一

五

呂宋居南海中去漳州甚近蘇祿地近漳諸書言順

沉閩婆去泉州甚遠似俱與臺海無涉

流而東而南者就內地言之也臺處東南其北之雞  
籠山卽內地之東其南之沙馬磯頭卽內地之南水  
歸東南故皆可曰順流或東或南俱錯過臺灣山後  
大海茫茫舟隨風去無所終泊得還中土者蓋鮮幸  
而島嶼可依帆柁未失乘風忽返閒嘗有之其所至  
果弱水之東否未可知也聞老舵工云嘗遭風至臺  
灣山後絕遠處夜聞水聲泐泐知爲萬水朝東努力  
廻柁幸免落滌天明見島嶼甚近語似可據然聞水

聲以爲落溲非也島岸風濤衝擊作聲也舟不迴棹  
觸礁壘粉無生還理舊稱落溲雜云沉海乃舟人之  
諱詞風土記謂十二年氣候一週溲水復滿東風大  
起船乃還則海濱人習言之特以慰其家人卽詩所  
云猶來無止耳亦有擱淺簸浪因而傍崖登山者苟  
延殘喘際會幸歸各述所見大海之中何奇不有何  
怪不儲存而不論可也島上坵傳所稱南風烝今亦  
莫知其處

臺船歲往江浙錦蓋諸州者以千計沿海水程內地

青照堂叢書

三編

臺灣志畧一

三

郡邑志及通志俱未詳載旣無以稽舟楫之去來又  
何以資哨防之備禦倘謂邑志例限不書得毋終聽  
其闕乎因就見聞所及附著於此至道里遠近澳港  
險易畧之以俟知者

臺船至廈門水程一十一更自廈門至浙江寧波水  
程三十七更江南上海較遠十更先由廈門掛驗出  
大擔門北行經金門遼羅係同安縣界過圍頭深滬  
浚裡至永寧俱晉江縣界又過祥芝頭至大墜爲泉  
州港口經惠安縣之瀨窟至崇武可泊船數十復經

莆田縣之湄州至平海可泊船數百其北卽南日僅容數艘莆田福清交界從內港行經門榻後草嶼至海壇宮仔前有鹽嶼卽福清港內過古嶼門爲長樂縣界復沿海行經東西洛至磁澳回望海壇諸山環峙南日古嶼之東出沒隱現若近若遠再過爲白畎爲關潼可泊船數百乃福省半港處入內卽五虎門出關潼一潮水至定海可泊船數百餘復經大埕黃岐至北茭爲連江縣界再過羅湖大金抵三沙烽火門由三沙沿山戢駛一潮水過東壁大小目火焰山

青照堂叢書

三編

臺灣志畧

七

馬嶼進松山港卽福寧府由烽火門過大小崙山峯與水澳至南鎮沙埕直抵南北二關閩浙交界由北關北上至金香大澳東有南紀嶼可泊千艘其北爲鳳凰澳係瑞安縣港口又北爲梅花嶼卽溫州港口過壠內三盤僞鄭常屯劄於此再過王大澳玉盤山坎門大鹿山至石塘內爲雙門衛復經鑿壳澳深門花澳馬蹄澳雙頭通至川礁爲黃巖港口從牛頭門柴盤抵石浦門由龍門港崎頭至丁厝澳澳東大山疊出爲舟山地赴寧波上海在此分舩從西由定海

關進港數里卽寧波從北過岑港黃浦至沈加門東  
出卽普陀山北上爲秦山花鳥巖秦山西南有板椒  
山屬蘇州府界又有羊山龍神甚靈凡船到此須暫  
寂而過放大洋抵吳淞進港數里卽上海再由舟山  
丁厝澳西北放小洋四更至乍浦海邊俱石岸北風  
可泊於羊山巖向北過崇明外五條沙轉西三十四  
更入膠州口過崇明外五條沙對北三十二更至成  
山頭向東北放洋十一更至旅順口由山邊至童子  
溝島向東沿山七更至蓋州向北放洋七更至錦州

青照堂叢書

三編

臺灣志畧

一

府

自廈門出大擔門外南行由浯嶼至南澳凡一十三

澳曰浯嶼麥坑鎮海衛將軍澳陸鰲杏仔古螺銅山

蘇尖劉澳角宮仔前懸鐘南澳入廣東界

附記自浙入閩由沙

埕南下一潮水至南鎮南鎮一潮水至南關南關一潮水過大小白鷺至屏峯屏峯一潮水至崙山門崙山門一潮水至三沙三沙一潮水過大小目至短表過海尾澳長表一潮水至斗美斗美一潮水過閩尾至羅湖羅湖一潮水過西洋至北菱北菱順風一潮水至黃岐若遇逆風則在北菱候風黃岐一潮水過赤澳猶塢安海黃宮四嶼至定海定海一潮水過小目入五虎門到虎樹虎樹一潮水過白塔巖斗浮江雙龜破薦入金牌急水門至館頭館頭一潮水過梅嶼長灣大小蘆亭頭至福州閩安鎮又館頭一潮水過

往北港過蓬崎至荻蘆過烏  
猪小目小埕長澳復至定海

南路沙馬磯頭之南有澳名龜那禿北風可泊巨艦  
從此東去水程四更至紅頭嶼生番聚處地產銅所  
用什物皆銅器不與中國通順風兩日夜卽是呂宋  
之謝崑山大小覆金山沿山行四五日夜至呂宋共  
水程五十八更

臺灣風信自廈來臺以西北風爲順自臺抵廈以東  
南風爲順但得一面之風非當頭逆頂皆可轉帆俄  
駛故兩舟並行一往一來不聞阻滯僅分遲速惟鹿

青照堂叢書

三編

臺灣志畧

一

耳門進港忌東風出港忌西風而臺灣風信與內地  
迥異清晨必有東風午後必有西風名曰發海西去  
來諸舟乘之以出入乃天造地設之奇時或反是則  
颶風將作去者未可遽去來者必亟收回云

舟人呼大風曰暴按詩邶風終風且暴傳云暴疾也  
疏云大風疾起也舊志暨鳳山各志以暴爲報失其  
義矣府志作颶亦誤颶乃海中災風其至叵測暴則  
每月有期所傳名稱雖涉怪誕而驗之多應比暴期  
將至舟必泊澳俟暴發後輒尾之而行最便利不爲

災府志又云颶之甚者曰颶颶條發條止颶常連日夜颶驟而禍輕颶緩而禍久考六書無颶字所云颶者乃土人見颶風挾雨四面環至空中旋舞如篩因

曰風篩謂颶風篩雨未嘗曰颶風也臺音篩同台加

風作颶諸書承誤今刪之按韻會海中大風曰颶投荒雜錄云嶺南諸郡皆有

颶風以四面風俱至也南越志颶風具四面之風常以五六月發永嘉人謂之風癡陸放翁曰嶺表有瘴

母初起圓黑久漸廣謂之颶母韓文公赴江陵詩颶起最可畏旬哮籛陵邱注嶺表錄異云嶺嶠夏秋雄

風曰颶又云南海夏秋間有雲物如虹長六七尺見則颶風必發故曰颶母其風一發雞犬不寧並從具

音懼康熙字典載韻箋引楊升庵說颶作颶音貝佛經云風虹如貝柳柳州詩颶母偏驚作客船補入七

青照堂叢書 三編 臺灣志畧 一 三

隊逸字中又六書故颶補妹切海之災風也俗書訛作颶正字通復云颶字即颶字之訛又藝林伐山云颶風之作多在初秋南越志亦云颶母即孟婆春夏間有暈如虹是也又李西涯談許氏從具謂具四方之風乃北人不知南人之候誤以颶為颶耳西涯博學必有所據且閩粵諸儒皆云颶風今韻書多作颶並誌以備考

逐月風暴日期 參合郡縣舊志及碑海紀遊

正月初四日 諸神下 初九日 玉皇暴是日有風則一歲暴期皆驗否則難準

初十日 十三日 閩帝 十五日 廿四日 小妾 廿九日

日 龍神會暴此暴最準或前一日俗呼洗炊籠或本日連後三日俗呼烏狗報白鬚

二月初二日 節白 初七日 春期 初八日 張大 十九日

諸暴皆因俗

觀音暴一廿九日龍神朝

三月初三日真武初七日閻王十五日吳真人十七日

諸神會十八日后土廿三日媽祖暴俗云真人廿八

日東嶽廿九日諸神升

四月初一日白龍初八日太子十四日純陽仙廿三

日太保廿五日龍神會

五月初一日南極星君初五日競渡風洋初七日朱

暴尉十三日閻帝降十六日天地合日廿一日龍母廿

九日威顯

青照堂叢書 三編 臺灣志畧 一 三

六月初六日大禹王暴前後共七日宜謹十二日彭

暴十八日彭婆十九日觀音廿三日小姨廿四日雷

暴最準廿六日二郎廿八日大姨廿九日文丞

亦最狠廿六日神暴廿八日鬼子暴十八日神敘交廿

七日天地合日

八月初一日竈君朝初三日防惡初五日九皇十四

日伽藍十五日龍神大

九月初九日落帽十一日百神十五日俱起十六日張

暴十七日金龍十九日觀音廿七日冷風

十月初五日小春初六日天曹下初十日水仙

多魚十七日水府二十日東岳廿六日翁爹

十一月十四日小仙廿七日普庵二十九日西岳

十二月廿四日諸神昇天俗呼掃塵暴自本日廿

九日大盆

三春暴期最多舟行宜戒自清明後南風司令四五

月閉風暴皆輕往來甚穩但多遲緩夏至前數日當

有北風諺云北風送夏至猶冬至前之有東南風惟

六七月北風一起颶風立至六月之颶得雷而止七

青照堂叢書 三編 臺灣志畧 三

月之颶聞雷愈烈八月白露節後北風應候船行迅

駛九月風每經旬或至閱月是名九降比颶多挾雨

九降恒不雨而風遙望外海浪色如銀播空叠出名

曰起白馬舟不可行又自寒露至立冬止常陰晦俗

呼九月烏十月小春天氣晴暖風波恬和最為利涉

十一十二兩月朔風凜烈無日不風第乘風隙以往

來若冬春之交風信難定尤須戒心考各書多稱渡

等月為穩最忌六七月然癸亥平臺辛丑復臺

皆以六月興師過舟安如在席蓋海上風濤實難例

此自通論

且或同時遭風倏變而此順  
彼逆禍福不同者有數存焉

凡暴風有先期一二月發或後期二三日發俟盛發  
之後舟乃可行亦有乘其將發而輒行者蓋風始發  
猶未盛迨盛發時舟已入澳也舵師占風熟極生巧  
直是心通造化春暴畏始冬暴怕終南風多開北風  
罕斷也春夏時風不勝帆船之小者其行速秋冬時  
帆不勝風船之大者其行穩

海船固畏風又苦無風洋中風靜水平如鏡必寄旋  
駐舟候風始行蓋大海潮汐無瞬息停人處舟上一

青照堂叢書

三編

臺灣志畧

三

望空明連天無際不覺其動實有升降漲蝕之異舟  
不下棹則乘潮而北隨汐而南難定所向之何方矣  
清明以後地氣自南而北以南風爲常霜降以後地  
氣自北而南以北風爲常偶反其常必有颶風  
颶風起時飄瓦裂石拔木壞垣四面遞轉交發齊至  
或一二日或三五七日久而愈勁猛雨益傾驚濤山  
立舟雖灣泊難保無虞然發有其處或數千里之遙  
便不相及

泊舟之澳負山面海山在南者可避南風山在北者

可避北風若風平浪靜無論黑溝白洋皆可寄泊惟  
五六月間南風司令陡遇北風不可收泊北風澳蓋  
颶風將發北風先至必轉東南又轉而南復轉西南  
呼吸變更以北澳而受南颶駕避不及朦朧成壘粉  
矣

五六月間天上有一點黑雲頃刻間風雨驟至舟人

必摺帆嚴柁以待遲則恐風壓帆傾或至覆舟

有因不得

收帆而棄桅者兩斧卽斷可知風力之雄又洋船中  
見有黑氣一條湧出海面漸及半天名曰鼠尾雲乃  
龍起也急焚雞毛  
或飯米以厭之

青照堂叢書

三編

臺灣志畧一

雷

凡疾風挾雨驟至驟止俗呼爲西北雨亦曰風時雨  
海水忽變爲腥臊穢氣襲人或泡沫浮若糠粃及水  
蛇鱗介之屬游翔水面乃地氣發而海沸也颶風應  
之雨灑浪翻遂有傾檣折舵之患若海不先沸風雖  
迅突摺帆順馳猶鯤鵬之徒耳

蘇過颶風賦斷霓飲海而北指赤雲挾日以南翔二  
語最精確今舟人呼斷霓爲破篷以其一片孤懸天  
際若船帆也稍及半天如鬣魚尾者曰屈鬣見於北  
方又甚於他方凡虹霓朝見西方辰巳時必雨暮見

東方必晴惟斷霓雖見東方來日亦不免風雨

舊志

海水有潮汐晝曰潮夜曰汐或謂汐為夜潮故言潮可統汐也凡潮月自初一至十五日為一周後半月與前半月適相同焉臺灣一日巳亥初四刻潮滿二日巳亥正三刻潮滿三日午子初三刻潮滿四日午子正一刻潮滿五日午子正四刻潮滿六日未丑初三刻潮滿七日未丑正三刻潮滿八日申寅初二刻潮滿九日申寅初四刻潮滿十日申寅正三刻潮滿十一日酉卯正一刻潮滿十二日酉卯正四刻潮滿十三日戌辰初三刻潮滿十四日戌辰正二刻潮滿十五日戌辰正四刻潮滿是為一周十六日與初一日同蓋週而復始矣凡陽時管三日陰時管二日凡潮自始長至滿歷三時自滿至涸亦歷三時故語其滿而前後可推也

澎湖潮遲於臺灣三刻早於廈門五刻以是為常

邵子曰海潮所以應月者從其類也余襄公安道云陽燧取火於日陰鑑取水於月各從其類觀有漲退海非增減月之所臨水往從之故月臨卯酉則水漲於東西月臨子午則潮平於南北彼竭此盈往來不絕皆係於月晝夜之運日東行一度月行十三度有奇故太陰西没常緩於日三刻有奇

青照堂叢書

三編

臺灣志畧

卷一

潮之日緩其期率亦如是自朔至望常緩一夜潮  
 自望至晦復緩一晝潮春夏潮常大秋冬夜潮  
 常大春為陽中秋為陰中歲有春秋猶月有朔望  
 故潮之極漲常在春秋之仲濤之極大常在朔望  
 之後又云海之極遠者得氣尤專潮亦因之東海  
 南海其候各有遠近之殊舊志云以水從月最為  
 確論臺灣地處東南月常早上初二十七日夜初  
 昏即臨卯酉故潮亦因之又舊志臺灣潮信與內  
 地惠安志所載畧同視同安晉江各差一時如初  
 一十六日臺惠潮水漲滿在巳亥時同安則在子  
 午晉江則在辰戌也晉同潮水入溪差至兩時以  
 道理迥遠之故無足異者臺處海中潮信宜可為  
 準乃南北二路復自不同鹿耳門至南路打鼓港  
 較同安金厦潮早四刻水長五六尺打鼓港至瑯  
 嶠竟早一時水止三四尺北路三林港至淡水復  
 與金厦同時水長丈許又自彰化以下潮流過北  
 汝流過南澎湖亦然彰化以上則潮流過南沙流  
 過北一郡似此懸殊何況東海西海南海北海相

青照堂叢書

三編

臺灣志畧一

彙

去不可量  
 數者平

巳 初一	午 初二	未 初三	申 初四	巳 初五	午 初六	未 初七	申 初八	巳 初九	午 初十	未 十一	申 十二	巳 十三	午 十四	未 十五	申 十六	巳 十七	午 十八	未 十九	申 二十	巳 廿一	午 廿二	未 廿三	申 廿四	巳 廿五	午 廿六	未 廿七	申 廿八	巳 廿九	午 三十
辰 廿八	卯 廿七	寅 廿六	丑 廿五	子 廿四	亥 廿三	戌 廿二	酉 廿一	申 二十	巳 十九	辰 十八	卯 十七	寅 十六	丑 十五	子 十四	亥 十三	戌 十二	酉 十一	申 十	巳 九	辰 八	卯 七	寅 六	丑 五	子 四	亥 三	戌 二	酉 一	申 三十	巳 廿九
潮長圖													潮滿圖																

右圓十二辰指掌定位也推潮長法以初一初二  
加於卯位左旋順數至寅而止推潮滿法以初二  
初三加於巳位左旋順數至辰而止陽時管三口  
陰時管二口而一月之大概定焉初二初長  
在卯則長半在辰滿在巳初退在午退半在未  
在申再長在酉長半在戌滿在亥初退在子退半  
在丑退在寅自長至滿歷三時  
至洄亦歷三時而潮信可知也

臺處閩東南隅地勢最下四面環海遙隔重洋其氣  
候與內郡懸殊大約暑多於寒鍾鼎之家狐貉無所  
用之細民無衣無褐亦可卒歲花卉則不時常開木  
葉則歷年未落瓜蒲蔬茹之類雖窮冬亦華秀此寒  
暑之氣候不同也春頻早秋頻潦東南雲蒸則滂沱

青照堂叢書

三編

臺灣志卷一

三

西北密雲鮮潤澤所以雲行雨施必在南風盛發之  
時此雨暘之氣候不同也四時之風南颺居多七八  
月間因風擊浪摧檣傾楫其濤浪之聲遠聞百里外  
風之所自曉東暮西與中土頓殊此風颺之氣候不  
同也卽一郡之中而窮南極北氣候亦迥不侔自邑  
治至鳳山漸南漸熱自邑治至諸羅彰化漸北漸寒  
此南北之氣候不同也

邑治附郭和暖時多與彰化之極北而多寒霜雪頻  
降者異矣人居稠密烟火萬家零露旣稀瘴氣不入

與鳳山之極南甫晡而露降日出而霧消者異矣狂風雖作一二日而恬其與淡水之雞籠北風盛發累日不休者又異矣三月以後風多南八月以後風多北其與鳳山之東港瑯嶠等處有永年不聞朔風者又異矣近郭之地平原曠野培塿相聯非若雞籠之山氣候爲足憂也夏暑而冬寒春和而秋暖非若東港之盛暑入夜猶怯寒臘月之窮冬袂衣可度日也至於澎湖之氣候則又與邑治不同者澎島處汪洋浩淼之中多風而少晴故有時臺則天清氣朗而澎湖則風聲凜烈辰方霧掃雲收而午後封姨爲祟又其甚者積日連月靡有行列行舟之人遲滯累旬來往難期他如寒暑雨暘則澎之與臺約畧相等天氣四時皆夏恒苦鬱蒸遇雨成秋比歲漸寒冬月有衣裘者至霜霰則無有也

洋船至澎湖另一氣候未至尙穿棉一至則穿葛

廣東志云嶺南陰少陽多故四時之氣闢多於闔一

歲閒溫暑過半元府常開毛腠不掩每因汗溢卽致

外邪蓋汗爲病之媒風爲病之本二者一中寒瘧相

乘其疾往往爲風湍又云盛夏士庶出入率以青布  
裹頭蓋南風爲厲一侵陽明則病不可起此地正相  
同

海氣山嵐交釀爲露值夜霏霏如霰邨舍山林咫尺  
莫辨茅簷曰高尙溜餘滴故冬春無雨二麥瓜菜不  
以爲病又有紅日三竿天氣清明忽陰翳溟濛更爲  
濃露變幻俄頃殊不可測

內山終歲不離雲或囂于頂或橫于腰恣悅飄渺莫  
窮其際偶於侵晨片晌翠黛筍篴望之如洗須臾卽  
雲合矣若日中雲收峯嵒可數必不日而雨海內之  
山未有以清朗爲雨候者

夏秋紅日當空片雲乍起傾盆立至一日之內陰晴  
屢變或連月不開冬春二時或昧且霜飛日中雨注  
方在搖扇旋苦寒風客斯土者寧過暖而無受寒則  
邪氣不得而中之矣

三月輒着輕紗至十月不更每朔風驟凜忽易薄裘  
曦光一射仍被穀衫一日之間暄涼數變故讖集之  
頃袷毳兼攜以備不時脫換砌蟲夜響竟歲皆然春

初已縱夏蓐膽餅折供石榴與山茶掩映不足怪也更有狂飈怒號轉覺灼體風過後木葉焦萎如熟俗謂之麒麟颺云風中有火殊可詫異

舊傳野不苦旱以土沙含潤又露氣重也于嘗秋郊早行辨明時草露已稀志所謂入夜霏霏如霰茅簷日高尙溜餘滴者無有也或曰近年人煙漸稠故露氣減於昔云

海上天無時無雲雖濃雲靄黷但有雲脚可見必不雨雲脚者如畫家繪水口石其下橫染一筆爲水石

青照堂叢書

三編

臺灣志畧一

四

之界者是也無脚之雲如畫遠山但見山頭不見所止

日色被體如灼三日內必雨

日出時有雲蔽之辰刻後雲漸散必大晴日初出卽開朗是日必不晴暑月久晴則不拘

日落時西方有雲氣橫亘天上或作數十縷各不相屬日從雲隙中度過是謂日穿經緯來日大晴或雲色一片相連其中但有一二點空竇得現紅色是謂

金烏點晴亦主晴

日落時西方雲色黯淡一片如墨全無罅竇又不見雲脚者主來日雨若雲色濃厚當夜必雨

日落時西北方雲起如層巒複嶂重疊數十層各蟲起主大風雨山崩水溢之徵也應在七日之內嘗三觀此雲三遭大水矣處近山及江汭水涯宜防之五更雨雞初鳴雨天未明雨天明已久雨皆主是日苦雨不輟晨起霧遮山脚主晴雲罩山頭主雨初雨如霧雖沉晦至午必晴

久雨後暫輟猶見細雨如霧縱令開朗旋即雨至諺

青照堂叢書

三編

臺灣志畧

一

曰雨前濛濛終不雨雨後濛濛終不晴

久雨夜忽開霧星月朗潔主來日大雨若近暮經見紅光然後見月則晴

久雨後近暮遍天紅色來日必晴俗云火燒薄暮天虹霓朝見西方辰巳必雨虹霓申酉見東方必晴又斷虹兩頭不連者俗呼破篷雖見東方來日不免風雨

諸山煙靄蒼茫若山光透露便爲風雨之徵又饑焉高唳海鶴驚飛則踰日必風春日晚觀西冬日晚觀

東有黑雲起主雨諺云冬山頭春海口  
臺邑春日雨澤獨少鐵線橋以北大雨滂沱橋南無  
一滴梁觀察文科惡其限於南改名通濟橋

### 風俗

居臺灣者皆內地人故風俗與內地無異正月元日  
慶新歲上元燈節二月春社清明掃墳墓端午戲龍  
舟懸蒲艾祓除七月七夕乞巧結線十五日做盂蘭  
會八月秋社九月九日登高放紙鳶冬至餽米團十  
二月二十四日祭竈送神卒歲臘先祖及諸神祠皆  
青照堂叢書 三編 臺灣志畧一 望

與內地無異昏喪沿俗禮以貧富爲豐歉悉類內地  
俗信巫鬼病者乞藥於神輕生喜鬪善聚黨亦皆漳  
泉舊俗然有其異者舊志云民非土著百貨皆取資  
於內地男有耕而女無織以刺繡爲工視疎若親窮  
乏貧苦相爲周卹民雖貧不爲奴婢習尙華侈衣服  
概用綾羅雖與隸庸販衣袴率多紗帛自內地初至  
者恒以爲奢久之習爲固然宴客必豐珍錯價倍內  
地互相角勝蓋其大畧如此然有爲甚害者曰鴉片  
曰賭局充衢蔽野富者以之而貧中人以之爲不肖

今鴉片且遍  
行中土矣宜  
嚴查嚴禁

固其俗喜聞

與以檳榔一  
洋錢便隨人  
械聞  
來南曰何難  
之有在乎人  
耳

不軌之徒於是聯絡必革此二者民乃久安或曰難  
焉

物產

穀言全臺則內地賴之邑地狹而人衆常仰食於南  
北二路故穀不及遠其種類之多與內地同麥晝開  
花異粵閩而同於齊魯故特美然少種價數倍於穀  
番麥番人種之美亦遠遜常種

貨糖爲最油次之糖出於蔗油出於落花生其渣粕  
且厚值商船賈販以是二者爲重利濶菁感產而佳

青照堂叢書

三編

臺灣志畧一

聖

薯榔肥大如芋魁故皂布甲於天下水藤出內山長  
條遠蔓跨山嶺採者得一莖窮其本即可數百觔麋  
鹿麋皮皆巨產今少有焉卓戈紋番布也番毯毛被  
番婦所織剝樹皮雜獸毛爲之

疏落花生爲最番薯芋冬瓜肥美他與內地同

果舊制貢西瓜今罷柿佛手柑皆肥大波羅蜜天波  
羅也黃梨地波羅也甘蔗龍眼多爲美椰子桄榔少  
而珍荔支臺地無之邑獨種近皆成林美不減內地  
檟番蒜也高樹廣蔭實如鷺卵皮青肉黃剖食甘美

始生時和鹽薑搗爲菹曰蓬萊醬棧古無其字始見於鄭樵通志其種傳自荷蘭菩提果佛國種也畧似枇杷而肥大空其中細絨屬蒂懸其核播之珞路然嗅之辛烈噉之甜而清釋迦梨美樹綠實實大如拳礪柯皺紋如佛頭

藥內山多茯苓大者可二十觔遠勝於浙產鹿茸麋茸鹿角膠鹿角霜鹿肚草栴榔樟腦通草梔子茜草薑黃皆美其他土人所用指某病採某草於病弗能明其由於藥言其主治而不識其性故不足錄

海東札記

青照堂叢書

三編

臺灣志畧一

畧

云藥品多本草所弗載者舊志及赤嵌筆談諸書所錄甚夥如羊甘烏胡雞骨鴨嘴鼠尾蠶殼與夫四時春半天飛過江籠鉢馬鞭之屬名旣不典性亦難識雖主治各有方刃圭當勿輕試也

石澎湖文石可作朝珠雜珮

木內山多美材其可識者樟楠楓棟椿榕桐荆鉄樹  
婆羅蕭朗桃榔鹿仔樹楮也臺人初不識楮見鹿喜食其葉則謂楮爲鹿仔樹加冬厚栗茄藤黃目赤鱗九芎象齒交標苦荅皆以俗所稱名之荪茶亦曰林投蠻語投與茶音相近沿其音而不得其文則以爲荪茶林投云爾其樹直幹無枝長葉利刺刺列如

鋸齒叢心結實如鳳梨不可食擘其實子顆顆如金鈴初生著地榛莽蘆之屬也漸長高如栢欄年久老而成木堅緻有文理宜作筴及朝珠歌板月琴諸樂器綠珊瑚有枝無葉嫩翠叢生極杖如珊瑚甚脆折之有毒漿沾人臙膚輒爛人家及村墅徧植之以爲藩蔽與蒜茶刺竹同功

使槎錄云樵者鬻薪于市每多堅質紫色竈煙間香氣拂

拂若爲器物必精良徒供爨下之用實可惜海東札記云每于雜薪中拾木如蟲痕甚如濕漬腐朽者逆裂之堅異常揮斤有難色矣質油滑如塗膏睇之完蝕相錯洵製器美材俗呼爛心木究不審何許木也按臺灣地氣濕熱雖有佳木以製器多蠹敗於內地則不蠹內地器物來者至久亦蠹

青照堂叢書

三編

臺灣志畧一

壘

竹諸類不一獨刺竹爲盛產筍之美惟茱竹筍

花扶桑木槿山丹茉莉薔薇賴桐刺桐皆盛產桂類月開者多梅桃蓮菊徒自內地開花常違其候惟蘭蕙則否七里香山礬花也所種之地蠅蚋不生辟烟瘴每五六月開花繁英堆雪濃香遠聞故世人以七里香目之猶夫芸草之香可辟蠹亦名七里香也芸草之名七里香以其葉山礬之名七里香以其花故訛者以山礬爲芸草木蘭花樹高一二丈夏秋盛開歧穗黃粒粒如珍珠碎米清馥殊勝自內地皆以木

蘭稱之非離騷樂府之所云也指甲花樹若垂楊長  
條柔蔓其枝葉大類枸杞簇穗纖花花六瓣淡黃細  
碎芳氣襲人女子搗其葉染指甲功同鳳仙貝多羅  
花樹多瘦結枝皆三枚葉如枇杷而厚花瓣五六出  
大如小酒杯瓣皆左紐香如擘橙樹大者日開萬朵  
落地如鋪銀曇花優鉢羅也晚香玉葉月下香也斑  
枝木棉也消息花刺毬也午時梅子午花子午花金  
錢也葉上花三友也鷹爪蘭如鷹爪藤本而香濁雞  
爪蘭如雞爪易種而香清樹蘭花于高樹或六葉四  
葉交枝蓮午時開開則旋落四英藤本延緣花白如  
雪花皆四瓣故曰四英蠻語音同素馨則以爲素馨  
萱草宜男五月開花花可食曰黃花菜鹿葱鬼蒜十  
月開花花可食曰金簪菜二者自內地常溷焉蓮蕉  
甘蕉也觀音蘭美人蕉也玉蘭辛夷也老來嬌雁來  
紅也番睡香夜來香也噴雪白似噴雪蝴蝶黃似蝴  
蝶番蝴蝶金絲蝴蝶唐棣石榴鬼絲梔子夜合繡毬  
鳳仙蜀葵向日葵夾竹桃西來嬌并開花無殊  
草紅毛茶花黃葉如瓜子花葉皆五瓣取其根乾之

可煎飲云治氣萎藤扶留也葉如薯南方人採其葉  
或截其附根藤夾檳榔食之用辟瘴霧種自番馬來  
其子爲蒟醬漢武帝感之而開牂牁越巂者

禽四時常有者燕雀多如內地鳩斑鳩色青黑火鳩  
項下赤金鳩體純綠紫趾紅白鳩毛如雪知氣候其  
鳴應更來自咬啣吧烏鶯鷺鳥亦隨更鳴能作百鳥  
聲鵲鶴食蛇番葦似鵲鶴飛則鳴行則搖長尾三娘  
朱喙翠翼產深山中彩囊項有五采鵲鵲也黃鸝  
倉庚也鷓鴣鷓鴣韞雀巧婦桃蟲也海八哥海鷺海

青照堂叢書

三編

臺灣志畧一

畧

雞皆水食鳥也喜鵲海外無之蔣太守元樞自內地  
捕雌雄縱林木中今葦育郡城多見南北路則無東海  
札記謂觀察所縱鵲逾年無一存者殊不然家畜雞鴨多於鷺五鳴雞鳴  
應更潮雞鳴應潮

獸內山產野牛千百爲羣圍而絕其食施羈勒象之  
與家牛無異馬地產小而弱麋鹿舊盛產今取之旣  
盡爲難得必求之番酋羊猪猫狗皆如內地熊猴山  
鼠番猪山猫亦時有

魚鯉鯢鱸鰻魷鱈塗魷麻虱目鯨魚馬鮫魴墨魚比

目貼沙皆美鯊龍文鯊爲最其翅特美烏鯊大者數  
百觔能食人虎鯊圓頭鯊皆噬人乞食鯊皮可飾刀  
鞘白鯊雙髻鯊烏翅鯊鋸仔鯊鼠蟬鯊蛤婆鯊油鯊  
泥鯊青鯊扁鯊狗鯊皆鯊屬烏魚鱗也冬至前捕  
者曰正烏肉肥冬至後捕者爲回頭烏則瘦鯊音魚  
身如蠟葉口在領下尾長一尺黃鯊大而肉粗燕鯊  
小而肉潤錦鯊身有花點大者三四百觔泥鯊掃帚  
鯊水沉鯊皆鯊屬舊志以鯊爲魴訛鰩魴也貼沙側口比目  
側目鮓黃魚黃魚石首也虎魚似虎鮓魚善跳白帶

青照堂叢書

三編

臺灣志畧一

吳

八帶八帶銀刀也蛇水母也海翁海鱸也獅刀烏類  
龍尖花身沙蠶紅紗青鱗花鈴金錢沙梭竹梭金梭  
遍身苦塗虱田鴿梳齒青箭飛鳥含西海蠣黃翅黃  
爵新婦啼飼子飯皆雜魚

介龜龜驚鬻香螺響螺花螺肉螺珠螺寄生螺石螺

田螺蟹虎獅蟹青蚶蟹金錢蟹沙鑽善鑽入沙沙馬

善疾走大腳仙桀步桀步擁劍也一螯大一螯小曰

擁劍膏多曰紅蟬無膏曰菜蟬螯尖而長者曰蠍螯

牡蠣也螯

俗音

車螯也水龜龍虱也蝦蚶西施舌蚌

煙皆產花蛤雍正癸卯驟生他少見海豆芽如小煙  
伸尾白如豆芽

蟲所產與內地無異惟蜥蜴能鳴鳴如吠蛤至北路  
則否蝥多而蝟蟬少二三月卽鳴於樹間者皆蝥

### 勝蹟

赤嵌樓在鎮北坊明萬歷末荷蘭所築背山面海與  
安平鎮赤嵌城對峙以糖水糯汁搗蜃灰疊磚爲垣  
堅埒於石週方四十五丈三尺無雉堞南北兩隅瞭  
亭挺出僅容一人站立灰飾精緻樓高凡三丈六尺

### 青照堂叢書

#### 三編

臺灣志畧一

一

有竒雕欄凌空軒豁四達其下磚砌如巖洞曲折宏  
邃右後穴窳左後浚井前門外左復浚一井門額有  
紅毛字四精鐵鑄成莫能辨識先是潮水直達樓下  
閩人謂水涯高處爲勘訛作嵌而臺地所用磚瓦皆  
赤色朝曦夕照若虹吐若霞蒸故與安平城俱稱赤  
嵌又以築自荷蘭亦名紅毛樓僞鄭貯火藥軍器於  
此入版圖後因之道標撥兵看守司啟閉康熙六十  
年臺變門遂不扃賊取門額鐵字以製器頻年地震  
屋宇傾盡四壁陡立惟周垣堅好如故乾隆十五年

知縣魯鼎梅移建縣署於其右因嚴扃鐫歲時則灑掃俾邑人士覽勝焉

赤嵌城亦名臺灣城在安平鎮一鯤身沙磧孤浮海  
上西南一道沙線遙連二鯤身至七鯤身以達府治  
灣轉內抱北與鹿耳門隔港犄角如龜蛇相會狀明  
萬歷末荷蘭設市於此築磚城制若崇臺海濱沙環  
水曲曰灣又泊舟處概謂之灣此臺灣所由名也城  
基方廣二百七十六丈六尺高凡三丈有奇爲兩層  
各立雉堞釘以鐵瞭亭屋布凌空縹渺上層縮入丈  
許設門三北門額鏤灰字莫能識大約記創築歲月  
者東畔嵌空數處爲曲洞爲幽官城上四隅箕張現  
存千斤大礮十五位複道重樓傾圮已盡基址可辨  
下層四面加圓凸南北規井下入於海上出於城以  
防火攻現存大礮四位西城基內一井半露半隱水  
極清冽可於城上引汲西北隅繚築爲外城抵於海  
屋址高低佶曲迷離其間政府第宅舞榭歌亭化爲  
瓦礫倚城舊樓一座棖棟堅巨機車一軸可挽重物  
以登城大礮凡數位內城之北基下闢小門偃僂而

地生鉛天耶  
抑有藏之者  
耶

入磴道曲窄已崩壞地下有磚洞高廣丈餘長數丈  
曲轉旁出舊傳近海處曾露一洞內得鉛子數百斛  
今失其處又舊志所載螺梯風洞俱不可復見大抵  
此城磚砌層疊悉以糖水糯汁搗蜃灰傅之堅不可  
劈其中或實或虛鬼工奇絕難以迹求 國朝康熙

元年偽鄭就內城改建內府塞北門欲闢南門斧鑿

不能入乃止又惡臺灣之名

閩音呼  
似埋完

改稱安平門曰

閭闔以春秋時鄭國有閭闔之門也入版圖後爲協  
鎮署廢而不居颶颶飄搖連年地震遂致傾圮五十

青照堂叢書

三編

臺灣志畧

一至

七年鳳山縣知縣李丕煜奉文葺之前爲門中爲堂  
後爲署旁列小屋數間今貯火藥軍裝乾隆十三年  
協鎮沈廷耀建塘房二間於外城南門內撥兵防守  
先是北面臨海一帶短墻坍塌潮水齧城基雍正十  
一年協鎮陳倫炯砌之乾隆十四年城西北暨教場  
南海岸冲崩計一百八丈邑監生方策捐銀三百兩  
築沙堤協鎮沈廷耀成之

荷蘭井在鎮北坊赤嵌樓東北隅距樓可二十餘丈  
紅毛所鑿磚砌精緻相傳每風雨時常有龜蛇浮游

水面乾隆十四年知縣魯鼎梅移建縣署今并在署  
內東北隅

大井在西定坊舊依海岸海鹹井沒舟人在此登岸  
名大井頭邇來民居稠密填海成陸市宅紛錯距海  
半里許矣舊志云開鑿莫知年代相傳明宣德間太  
監王三保抵臺曾於此井取水又傳明季時紅毛築  
赤嵌樓慮有火患故鑿此井以制之

烏鬼井在鎮北坊水源極盛雖旱不竭烏鬼番國名  
紅毛奴也其人遍體純黑入水不沉走海面若平地

青照堂叢書

三編

臺灣志畧一

五

先是紅毛命烏鬼鑿井砌以蒜茶亦名蒜茶井今改  
甃磚甃舟人需水咸取汲焉

馬兵營井在寧南坊泉沒而甘甲於諸井紅毛時鑿  
以灌園者偽鄭駐馬兵於此故名今舊井已毀改鑿  
其旁相去數武

一元子園亭明寧靖王朱術桂宅也在西定坊今爲

天后宮

鄭成功墓在武定里洲仔尾男經耐焉後奉 旨遷

葬內地南安縣

北園別館在永康里僞鄭爲其母董氏建後廢康熙  
二十五年巡道周昌因其地有茂林深竹乃結亭築  
室爲之記且繪而圖之諸羅令季麟光顏曰致徹二  
十九年巡道王效宗總鎮王化行改爲海會寺

陳氏別墅在武定里僞叅軍陳永華所築今廢爲槎  
林夢蝶園在永康里章人李茂春迹跡於此構茅亭  
居焉今爲法華寺

槎仔林在寧南坊僞勇衛黃安故宅後改爲施襄壯  
侯祠今圯

青照堂叢書

三編

臺灣志畧一

卷

五妃墓在仁和里魁斗山明

寧靖王

朱術桂妾袁氏王

氏秀姑梅姐荷姐仝葬此

國朝乾隆十一年巡臺

御史六十七范咸命海防同知方邦基修之立墓道  
碑於大南門外并繫以詩十六年知縣魯鼎梅修

陳烈婦墓在武定里洲仔尾僞叅軍陳永華女與其  
夫僞監國鄭克塽合葬處

李先生墓隆武舉人李茂春葬處在新昌里

天后廟在酉定坊后林姓興化莆田人父名愿五代  
時官都巡檢母王氏以宋太祖建隆元年庚申三月

二十三日產后於莆田之湄洲嶼方誕紅光滿室異  
氣氤氳生彌月不聞啼聲故名默娘八歲就塾讀書  
輒解奧義喜焚香禮佛十三歲得道典秘法年十六  
觀井得符能布席海上濟人雍熙四年丁亥秋九月  
九日昇化或云二月十九日年二十有八是後常衣  
朱衣乘雲遊島嶼間里人祠之有禱輒應宣和間賜  
順濟廟號自是訖明屢徵靈蹟嘉靖中編入祀典以  
後疊加徽號 國朝康熙十九年總督姚啟聖巡撫  
吳興許以蕩平海島神靈顯應奏准勅封二十二年  
青照堂叢書 三編 臺灣志畧一 五

我師征澎湖恍有神兵導引後屯兵媽宮澳靖海侯  
施琅謁廟見神衣袍半濕臉汗未乾始悟實邀神助  
又澳中井泉只可供數百口是日駐師萬人泉暴湧  
不竭及琅率舟師入鹿耳門復見神兵前導海潮驟  
漲表上其異 特遣禮部致祭 勅建神祠於原籍  
紀功加封 天后五十九年編入祀典雍正四年  
御賜神昭海表額於今廟十一年 賜錫福安瀾扁  
令江海各省一體奉祠致祭后英靈溥濟呼吸感通  
不可思議沿海船戶俱各虔供香火倘有危難輒呼

吾見嘗浮海  
者歸猶於家  
奉神虔祀之

媽祖洋中風雨晦冥慘黑如墨往往于檣端見神燈  
示祐舟必無恙今莆田林氏族中婦人飼子者將往  
田園或採捕以其兒置廟中祝曰姑好看兒去竟日  
兒不啼不饑不出闕暮各負以歸蓋神之篤厚宗人  
又如此

聖宮廟在永康里中樓仔街神姓倪軼其名生長海  
濱孰識港道爲海船總管歿而爲神州人咸敬祀之  
康熙三十年巡道高拱乾建乾隆五十四年里衿蔡  
廷萼等修又一在大東門內彌陀寺左一在西定坊

青照堂叢書

三編

臺灣志畧

壹

曰總管宮僞時建一在鎮北坊總爺街今圯

吳真人廟在西定坊新街僞時建乾隆五年里人王  
紹堂倡修六十年武舉張文雅等鳩衆重修神名本  
同安白礁人母夢吞白龜而娠生於宋太平興國四  
年不茹葷不受室精岐黃術以藥方濟人廉恕不苟  
取景祐二年卒里人祀之有禱輒應部使者請廟額  
勅賜慈濟慶元間復勅爲忠顯開禧二年封英惠侯  
按真人廟宇漳泉間所在多有荷蘭踞臺與漳泉人  
貿易時已建廟廣儲東里矣嗣是鄭氏及諸將士皆

漳泉人故廟祀真人甚盛或稱保生大帝廟或稱大道公廟或稱真君廟或稱開山宮通志作慈濟宮皆是也舊志所載除廣儲東里外其在東定坊尙有北線尾廟其在鎮北者二觀音亭邊僞時建水仔尾康熙三十五年建在永康里者一石頭坑武定里者一廟後古榕蔭可數畝在歸仁北里者一舊社口僞時建在文賢里一圖者三山頭社大甲社月眉池在文賢里二圖者一俱里衆所建在大目降莊者一僞時建有府志載在安平鎮者三

青照堂叢書

三編

臺灣志畧一  
羹

臨水夫人廟在寧南坊今移在東安坊山仔尾乾隆五十一年里人梁厚鳩衆建神名進姑福州人陳昌女唐大歷二年生秉靈通幻嫁劉杞孕數月會大旱因脫胎祈雨尋卒年僅二十有四訣云吾死後必爲神救人產難建寧陳清叟子婦懷孕七月不產神見形療之產蛇數斗其婦獲安古田縣臨水鄉有白蛇洞巨蛇吐氣爲疫癘一日鄉人見朱衣人仗劍索蛇斬之詰其姓名曰我江南下渡陳昌女也遂不見乃立廟於洞上凡禁魅却魃祝釐祈嗣有禱必應宋

靈殆與天后  
將

淳祐閒封崇福昭惠慈濟夫人賜額順懿復加封天仙聖母青靈普化碧震元君

三山國王廟在小北門內鎮北坊水仔尾祀粵潮州中山明山獨山之神三山在揭陽縣界原廟在巾山之麓賜額明貺潮之諸邑皆有祠祀粵人來臺者咸奉其香火故建廟云

開山王廟在東安坊舊圯乾隆年間邑人何燦鳩建邑又有稱王公廟大人廟三老爺廟者不知何神或云皆卽澎湖將軍澳之神也舊志云神之姓名

青照堂叢書

三編

臺灣志畧

卷

事蹟無考豈隋開皇中虎賁陳稜畧地至此因祀之歟又曰舊志府志載邑治東安坊有開山王廟今圯長興里有王公廟俱僞時所建查各坊里社廟以王公大人稱者甚夥東安坊則山川臺坑仔底西定坊則王宮港草仔寮海防署前寧南坊則馬兵營打石街鎮北坊則普濟殿三老爺宮以及安平鎮青鯤身北線尾喜樹仔永豐里紅毛寮中路南潭等處廟宇大小不一概號曰代天府神像俱雄而毅或黝或楮或白而皙詰其姓名莫有知

來南曰此辨  
不可少

者所傳王誕之辰必推頭家數人沿門釀資演戲  
展祭每一年卽大斂財延道流設王醮二三晝夜  
謂之送瘟造木爲船糊紙像三儀仗儼如王者盛  
陳優觴跪進酒食名爲請王愚民爭投告牒畢乃  
奉各紙像置船中競賫柴米凡百器用兵械財寶  
以紙或綢爲之無一不具推船入水順流揚帆而  
去則已或洄泊岸側則其鄉必更設醮造船以贖  
每費累數百金少亦不下百金雖窮村僻壤罔敢  
吝惜以爲禍福立至噫此誣神惑民之甚者也

青照堂叢書

二編

臺灣志畧一

彙

原事

日本者倭奴國也自明之中季其賊民常駕舟寇閩  
粵爲邊患嘉靖四十二年大將戚繼光敗之倭遁入  
海林道乾者倭黨也剽掠近海地都督俞大猷追之  
至澎湖道乾熟港道遂勾倭遁入臺大猷留偏師守  
澎湖嚴哨鹿耳門外已道乾懼爲倭所并又懼官軍  
追擊揚帆直抵浚泥壤其邊地以居號道乾港而臺  
地遭倭焚掠殘破土番多避近山倭亦旋去以後未  
嘗至臺明史所載外國諸傳可考舊志謂紅毛借地

於倭又謂紅毛攻逐倭寇傳聞之誤也至謂道乾巖舟打鼓山下恣殺土番取血和蜃灰以固舟則流寇之燥毒固有可信者

荷蘭明史作和蘭又稱阿南卽紅毛番也舊志暨諸書俱稱荷蘭其人深目長鼻髮鬚眉皆赤足長尺二寸頗偉倍常奉天主教本國在西洋者去中華絕遠與佛郎機近華人未嘗至土產金銀琥珀瑪瑙玻璃天鵝絨瓊服哆囉噠國土旣富轉販大泥呂宋咬啣吧諸國遇中華貨物當意者不惜厚貨往來海上所

青照堂叢書

三編

臺灣志畧一

堯

恃巨舟大礮舟長三十丈廣六丈厚二丈餘號曰夾板樹五桅桅如接筍可高低帆以布爲之盤旋如蛛網八面受風無往不順後爲三層樓旁設小總置大銅礮桅下有巨鐵礮長二丈發之可洞裂石城震數十里今所稱紅夷礮卽其製也柁後置照海大鏡徑數尺能照數百里萬歷時屢與佛郎機爭雄然舟大難轉或遇淺沙卽不能動而其人又不善戰往往挫衄焉萬歷三十一年秋七月入澎湖冬十月末乃去先是二十九年荷蘭駕大艦攜巨礮薄香山澳言

欲通貢市當事難之不敢聞於朝乃引去有海澄人李錦及奸商潘秀郭震久居大泥與荷蘭人習語及中國事錦曰若欲通貢市無如漳州者漳南有澎湖嶼去海遠誠奪而守之貢市不難成也其酋麻葦耶曰守土官不許奈何曰稅使高宗嗜金銀甚若厚賄之彼特疏上聞天子必報可守土官敢抗旨哉酋曰善錦乃大爲大泥國王書一移宗一移兵備副使一移守將俾秀震齎以進守將陶拱聖大駭亟白當事繫秀於獄震遂不敢入初秀與酋約入閩有成議當遣舟相聞而酋卞急不能待仰駕二大艦直抵澎湖時汎兵已撤遂登陸伐木築舍爲久居計錦亦潛入漳州偵探詭言被獲逃還當事已廉知其狀并繫獄已而議遣二人諭其酋還國許以自贖且拘震與俱三人旣與酋成約不欲自彰其失第云我國尙依違未定而當事所遣將校詹獻忠齋檄往諭者乃多攜幣帛食物覬其厚酬海濱人又潛載貨物往市酋益觀望不肯去當事屢遣使諭之見酋語輒不競愈爲所慢而宗已遣心腹周之範詣酋說以三萬金餽宗

卽許貢市曾喜與之盟已就矣會總兵施德政令都  
司沈有容將兵往諭有容負膽智大聲論說曾心折  
乃曰我從不聞此言其下人露刃相詰有容無所懼  
盛氣與辯曾乃悔悟令之範還所贈金止以哆囉噠  
玻璃器及番刀番酒餽家乞代奏通市案不敢應而  
撫按嚴禁奸民下海犯者必誅由是接濟露窮番人  
無所得食揚帆去迺撫徐學聚劾秀錦等罪論死遣  
戍有差萬歷之末荷蘭復入北港遂據之築城以居  
因稱臺灣焉

紅毛據臺在萬歷未詳載明史第云事  
耕鑿設闢闢不言築城者省文耳以形

青照堂叢書

三編

臺灣志畧一

卷

勢考之有城而後稱臺灣其云稱臺灣則築城之證  
也且鯤身沙磧海風飄蕩無城不可以居而當日闢  
闢設於此非無城可知至其所耕鑿處則當日謂之  
赤墘未嘗稱臺灣也竊意紅毛終信李錦奪守澎湖  
賄求貢市之說觀此地未入版圖無汛守而濱海土  
番懲後之害徙居近山遂先築此城以爲根本然後  
出據澎湖蓋紅毛利在互市非貪土城不然何不就  
膏壤而城之乎又各志皆云鄭芝龍入臺在先紅毛  
在後考明給事中何楷靖海疏云自袁進李忠楊祿  
楊策鄭芝龍李魁奇鍾斌劉香相繼爲亂海上歲無  
寧息其下有述則紅毛築城其中之語此疏上於崇  
禎八年諸志有謂城卽築於是年者得毋因讀此疏  
而誤乎

天啟二年荷蘭出據澎湖築城守之意求互市

守土官懼禍說以毀城遠徙卽許互市紅毛從之毀  
其城移舟去巡撫商周祚以遵諭遠徙上聞然其據

臺灣者自若也已而互市不成紅毛怨復築城掠漁舟六百餘俾華人運土石助築尋犯廈門官軍禦之俘斬數人乃詭詞求款再許毀城遠徙而修築如故已又泊舟風櫃仔尾出沒浹嶼白坑東椗莆頭古雷洪嶼沙洲甲洲間而海寇李旦復助之濱海郡邑戒嚴天啟四年巡撫南居益遣總兵俞忞皋復澎湖先是居益上言臣入境以來聞番船五艘復至與風櫃仔船合凡十有一艘其勢愈熾有小校陳士瑛者先遣往咬啣吧宣諭其王至三角嶼遇紅毛船言咬啣

吧王已往阿南國因與士瑛偕至大泥謁其王王言咬啣吧國主已大集戰艦議往澎湖求互市若不見許必至搆兵蓋阿南卽紅毛番國而咬啣吧大泥與之合謀必不可以理論爲今日計非用兵不可因列上調兵足餉方畧部議從之正月遣將先城鎮海港且築且戰番人退守風櫃城居益增兵往助攻擊數月猶不退乃大發兵命咨皋督諸軍齊進寇勢窘兩遣使求緩兵容運米入舟卽退去諸將以窮寇莫追許之遂揚帆去獨渠帥高文律等十二人據高樓自

守諸將破擒之獻俘於朝澎湖之警以息而其據臺灣者猶自若也崇禎三年荷蘭犯廈門時豫章鄒維璉撫閩拜鄭芝龍爲將芝龍募龍溪人郭任功率十餘人夜浮荷蘭船尾潛入焚之獲荷蘭五十餘人餘船悉遁不敢窺內地者數年十年荷蘭駕四舶抵廣州求市不可乃遁歸仍踞臺灣國朝順治十五年

甲螺

華言頭目也

郭懷一謀逐荷蘭事覺被戮漢人在臺

者遭屠殆盡十八年夏五月鄭成功入臺灣逐荷蘭

冬十二月荷蘭歸國

青照堂叢書

三編

臺灣志畧一

壹

鄭芝龍字飛黃小名一官南安石井人成功父也其大父紹祖爲泉州庫吏時蔡善繼爲泉守芝龍方十歲嘗戲投石子誤中守額守俞治之見芝龍貌咲曰法當貴而封乃釋之居無何落魄去之日本娶倭女生成功焉成功生之久倭島萬火齊明時爲天啟四年甲子於是芝龍復亡之海上有顏思齊陳衷紀者皆海澄人相與爲盜剽掠於海上一時楊六楊七劉香老輩皆從之芝龍與其弟芝虎共入其黨從思齊輩爲盜以所剽掠與紅毛市遂入居於臺灣未幾思

雄據者亦有  
端徽

齊死衆推芝龍爲長然大權猶屬袁紀也天啟五年  
朝議以蔡善繼爲泉州道使撫芝龍善繼以書招之  
芝龍感激遂約降比受降之日善繼坐戟門令芝龍  
兄弟囚首自縛請命芝龍素德善繼屈意下之而芝  
虎一軍皆譁竟叛去六年巡撫朱一馮遣都司洪先  
春擊芝龍於漳浦之白鎮會海潮夜生先春所部漂  
泊失道芝龍暗度上山詐爲鄉兵出先春後先春腹  
背受敵遂大敗然芝龍故有求撫意欲自達乃舍先  
春不追獲盧遊擊不殺復進至中左所提督俞咨臯  
青照堂叢書  
三編  
臺灣志畧一  
畝  
戰敗芝龍縱之走中左人開城門求不殺芝龍戒所  
部竟不侵擾泉州守王猷聞之乃遣人招之降崇禎  
元年秋七月芝龍殺陳表紀降於總督熊文燦朝廷  
責以報効二年春芝龍擊海寇李魁奇於粵中斬之  
於是以芝龍爲遊擊三年荷蘭犯廈門芝龍焚之走  
歸臺灣五年海盜劉香老犯小埕芝龍擊走之八年  
芝龍合粵兵擊劉香老於田尾遠洋大破之香老自  
焚死以芝龍爲叅將十三年擢芝龍副總兵芝龍旣  
除香老海氛頗息又以海利交通朝貴寢以大顯福

王立江南以芝龍爲正總兵封南安伯唐王以芝龍有擁戴功封太師平國公然芝龍首鼠觀望志在富貴而已丙戌我朝兵南下芝龍歸命焉封同安侯丁亥之歲芝龍子成功踞海上侵閩粵犯江浙甲午朝廷遣使撫成功成功不從乃繫芝龍於獄辛丑冬殺之戮其家

鄭成功者芝龍庶長子也小字森舍芝龍歸命時成功年二十已入泮爲諸生方衣單絺閒步階前聞父降咨嗟太息頌之其弟襲舍自外來成功告之故且

青照堂叢書

三編

臺灣志畧一

壹

曰汝宜助我卽與徒手出門從者十八人掉小舟至廈門隔港之古浪嶼山招集數百人方苦無資人不爲用適有賈舶自日本來者使詢之則二僕在焉問有資幾何曰僅十萬成功命取佐軍僕曰未得主母命森舍安得擅用漳泉父爲官其子皆得稱舍成功怒曰汝視我爲主母何人敢抗卽立斬之遂以其資招兵製械從者曰衆竟踞金廈門

鄭成功以弱冠招集新附踞守金廈門密邇內地閩省沿海港澳可以出兵進剿者在在皆是成功於丙

地港澳悉設舟師登陸爲寨隘守水口又徧布腹心於內地凡督撫提鎮衙門事無巨細莫不報聞皆得早爲之備故以咫尺地拒守二十餘年終不敗事其用心固已深矣成功於一切謀畫皆出已見其所任用不過荷戈執戟摧鋒陷陣之徒絕無謀士爲畫一策者非成功不好士亦非士不爲用良以謀畫無出成功右耳夜不就寢徧走達旦妻妾皆臥惟設酒果俟之成功至必取啖少許復走如故卽寢亦無定所固防姦人刺客亦屬有所思也

青照堂叢書

三編

臺灣志畧一

奕

成功以海外島嶼養兵十餘萬甲冑戈矢罔不堅利戰艦以數千計又交通內地徧買人心而財用不匱者以有通洋之利也 本朝嚴禁通洋片板不得入海而商賈壟斷厚賂守口官兵潛通鄭氏以達廈門然後通販各國凡中國諸貨海外人皆仰資鄭氏於是通洋之利惟鄭氏獨操之財用益饒暨乎遷界之令下江浙閩粵沿海居民悉內徙四十里築邊牆爲界自是堅壁清野計量彼地小隘賦稅無多使無所掠則坐而自困所謂不戰而屈人之兵固非無見不

知海禁愈嚴彼利益普雖知者不及知也卽疇昔沿海所掠不過厚兵將私橐於鄭氏儲積原無損益海外諸國惟日本最富強而需中國百貨尤多聞鄭氏兵精頗憚之又成功爲日本婦所出因以渭陽誼相親有求必與故鄭氏府藏日益自耿逆叛亂與鄭氏失好耿兵方圖內嚮鄭兵卽躡其後已據閩之興漳泉汀邵粵之惠潮七郡養兵之用悉資臺灣自此府藏虛耗敗歸之後不可支矣

成功久踞金廈門蓄志內侵造戰艦三千餘艘順治

青照堂叢書

三編

臺灣志畧一

卷

十三年將大發兵窺江南過浙之東甌泊舟三日連檣八十里見者增慄至江南羊山山有神獨嗜羊海船過者必置一生羊而去日久蕃息至福山不可數計鄭氏戰艦泊山下將士競取羊爲食故神怒大風驟至巨艦自相撞擊立碎損人船什七八失利而返至十六年復大舉入寇破京口犯江寧旋卽敗歸成功特重操練舳艫陳列進退有法將士在驚濤駭浪中無異平地跳躑上下矯捷如飛將帥謁見甲冑僅蔽身首下體多赤足不禪有以靴履見者必遭罵

嗜羊神乃亦有靈

斥併抑其實凡海外多淤泥陷沙惟赤足得免粘滯  
往來便捷故也

閩總督陳名景駐師漳郡城內方圖進剿鄭氏分兵  
沿海港口與官兵拒守有門子李文忠素機警善承  
伺意旨爲總督親信凡應對傳語悉委任之實陰通  
鄭氏者一日夜入總督臥內刺之取其首並竊令箭  
馳馬出南門稱有軍機傳令出城無敢致詰以首獻  
成功成功以其弑主甚惡之薄與一官不滿所望歲  
餘以他事斬之

青照堂叢書

三編

臺灣志畧一

亥

龍碩者大銅礮也成功泊舟粵海中見水底有光上  
騰數日不滅意必異寶使善泅者入海試探見兩銅  
礮浮遊往來以報命多人持巨繩牽之一化龍去一  
就縛旣出斑駁陸離若古葵鼎光艷炫目不似沉埋  
泥沙中物較紅衣炮不加大而受藥彈獨多先投小  
鐵丸斗許乃入大彈及發大彈先出鐵丸隨之所至  
一方糜爛成功出兵必載與俱名曰龍碩然龍碩有  
前知所往利卽數人牽之不知重否則百人挽之不  
動以下戰勝莫不驗康熙十八年劉國軒將攻泉郡

此等果信耶

龍碩不肯行強昇之徃及發又不燃國軒怒杖之八十一發而炸裂如粉傷者甚衆

成功婦董氏勤儉恭謹日率姬妾婢婦爲紡績及製甲冑諸物佐勞軍成功於賞賚將士揮千萬金不吝於女紅不令少怠使絕其淫佚之萌可謂得治內之道者矣

成功立法尙嚴雖親族有罪不少貸有功必賞金帛珍寶願賚無恠容傷亡將士撫卹尤至故人皆畏而懷之咸樂爲用其立法有犯姦者婦人沉之海姦夫

青照堂叢書

三編

臺灣志畧一

卷

死杖下爲盜不論贓多寡必斬有盜伐人一竹者立斬之至今臺灣百貨露積無敢盜者以承峻法後也長子錦舍卽鄭經與弟裕舍乳母某氏通成功知之命以某氏沉海錦舍又私匿之已逾三載無敢爲成功言者某氏怙寵頗陵錦舍婦婦不能堪以告其祖父唐某號杖臣者爲致書成功時錦舍守廈門成功居臺灣以令箭授禮都事黃元亮命渡海立取錦舍頭來并令錦舍母董氏自盡母子遷延未卽死會成功病亡得免時年三十有九

明末監國于以兵從者悉加顯秩鄭成功兵力獨強  
賜姓朱氏至僭號晉封延平王給金印成功受而藏  
之終身不一用仍稱招討大將軍其居臺灣傳三世  
悉遵明末紀元

鄭氏善穴地爲隧攻城多從隧入守者不能禦海澄  
公黃梧故鄭將也投誠封公守海澄縣鄭兵圍急梧  
堅守不下謂其將曰彼將爲隧何以禦之衆懼莫對  
明日梧下令徧取水缸盆盂數千命於城內五步置  
一缸貯水都滿遠城皆徧每缸撥兵民五人守之更  
青照堂叢書  
三編  
臺灣志畧  
一  
半

迭互易使注視水中晝夜無輟明日有報盆水微動  
者趨兵掘視則爲隧者已至其下矣卽入火藥隧中  
燃之煙出鄭營隧人皆燼此法前人用兵所未行書  
之以備城守之缺

順治十六年鄭成功大舉入寇七月抵焦山進據瓜  
州趨鎮江直薄金陵八月至觀音門我師以步卒搗  
其中堅而以騎兵繞山出其背前後夾擊成功大敗  
十七年五月

世祖命將軍達素總督李率泰率兵大搜兩島

廈門  
金門

十八年議取臺灣三月成功泊澎湖次鹿耳門紅夷大驚成功引兵登陸克赤崁城十二月圍王城不下成功乃使人告之曰此地乃先人故物今我所欲得者地耳餘悉以歸爾荷蘭乃降康熙元年成功卒二年

天子銳意南征遣人約紅夷合兵攻島大兵入兩島之賊爛焉

青照堂叢書

三編

臺灣志畧一

七十一

之期廉德

大清領南島人詳詳美合其是前大兵大國

和也代則人書之曰

大清領代傳與發利

十八年領東臺書三頁以此所遊勝次阻行門

青照堂叢書

劉振清金亭彙梓

男維翰宗臣校錄

臺灣志畧 二 朝邑

李元春時齋刪輯

男來南薰屏纂訂

軍政

軍營駐邑轄之內者其大綱有三曰總鎮標營駁全臺者也臺協水師營防海口者也城守營為邑治而設者也

舊制鎮守臺灣總兵官一員雍正十一年議准照山

陝沿邊之例為掛印總兵帶方印駐臺灣府城鎮北

坊乾隆五年總鎮何勉築堡中營中軍遊擊一員守備一員千總

青照堂叢書

三編 臺灣志畧二

一

二員把總四員馬步戰守兵八百三十五名內除外委六員

額外三員實兵八百二十六名馬四十匹駐防中路口營在鎮北坊

左營遊擊一員守備一員千總二員把總四員馬

步戰守兵八百五十五名內除外委六員額外三員實兵八百四十六名馬

四十匹駐防北路口營在鎮北坊 右營遊擊一員

守備一員千總二員把總四員馬步戰守兵八百五

十五名內除外委六員額外三員實兵八百四十六名馬四十四匹駐防南路

口營在東安坊 協鎮臺灣水師營在安平鎮鎮城一座

坐北向南紅毛所建雍正十一年總督郝玉麟奏准就城內建倉貯粟三萬石交營收管遞年磨米給兵

以免赴府支運之勞 本協副將一員 中營遊擊一員 守備一員

員千總二員 俱駐防安平鎮仍與右營輪防鹿耳門 把總四員 內二員隨防安平

平二員分防大港 蚊港二汛 步戰守兵七百八十二名 內除外委六員額外

三員航工炊糧十五名 戰船一十五隻 俱平字號舊為一十九隻

乾隆二十五年裁其一 砲架八座 鹿耳門汛 砲臺七座 海

至三十三年又裁其三 蚊港汛四座 煙墩十一座 蚊港六座 大港五座 左營遊擊一員

駐防鹿子港 守備一員 駐防笨港 千總二員 內一員隨防鹿仔港 一員分防大槩

砲把總四員 內二員隨防鹿仔港 笨港 二員分防新店 三林港 步戰守兵七

百三十三名 內除外委六員額外 三員航工 炊糧十六名 實兵七百零八名 戰船一

青照堂叢書 三編 臺灣志畧 二

十六隻 俱定字號舊為一十八隻 乾隆三十三年裁其二 砲架八座 內有銅

砲一座 乃鄭所遺 砲臺七座 安平鎮三笨港一海豐港一鹿仔港一煙墩

十一座 安平七笨港一海豐港一三林港一鹿仔港 鹿仔港其舊管砲臺砲架煙墩在安平者歸安平營

下管轄其在鹿仔港應有增設屬漳化嘉義轄下未

詳其 右營遊擊一員 守備一員 千總二員 俱駐防安平鎮

仍與中營輪防鹿耳門 把總四員 內二員隨防安平二 步戰守

兵七百八十二名 除實與中營同 戰船一十五隻 俱澄字號舊為一十

九隻 乾隆二十五年三十 砲架十四座 鹿耳門七 砲

臺五座 在打鼓港 煙墩二十一座 安平十打鼓十一 嘉慶十年臺

灣鎮道奏准添造梭船三十號另編善字號把守鹿耳門

暨巡外洋緝捕俱歸臺協副將統帶又奏准添設全

臺水師兵凡一千一百四十四名又額外委十名

除分派北路淡水外臺協每營各添派水兵三百三

十名計三營凡添兵九百九十名

城守營駐防邑治營在大北門內本營叅將一員

左軍守備一員駐防鳳山千總一員把總二員與千總輪防府

治及羅漢門左軍守備一員駐防嘉義千總二員鳳邑岡山

內一員乾隆五把總二員與千總輪防府治及嘉義

十三年增設日加溜灣大武壠下加

青照堂叢書 三編 臺灣志畧二 三

左軍馬步戰守兵五百四十名內除外委四員額

三十五名以八十五名駐防府治以四百五十右

軍馬步戰守兵六百三十九名內除外委六員額外

二名以一百七十三名駐防府治以四百五十九

左右軍凡馬四十匹凡各營兵皆自內地撥戍三年

期滿更代

附考康熙二十三年設鎮標中左右三營府城內

外汛塘具係三營撥兵分防雍正十一年總督赫

塘悉歸防守仍將三營之兵撤回府治以資彈壓

又考康熙二十三年設道標營撥鎮標右營守備

一員左營千總一員左右營把總各一員中左右

三營兵各一百名入道標營六  
十年裁其各官兵仍歸大營

又考臺營原無馬兵馬兵之設自乾隆五十三年  
始也

總鎮署在鎮北坊坐東北面西南中有三致堂總鎮張天

駿總鎮甘國寶題題益求堂國寶題鏡煙堂俱總鎮哈當阿題和雨堂

芝蘭室總鎮愛新泰題

中營遊擊署在永康里

中營守備署在遊擊署右

左營遊擊署在鎮北坊中有鏡清堂 岍舫俱遊擊余大進

建

青照堂叢書 三編 臺灣志畧二 四

左營守備署在鎮北坊

右營遊擊署在東安坊中有師慎堂 棟花書屋

刺桐園俱遊擊任承恩闢

右營守備署在東門內

城守營叅府署在北門內

水師協鎮署在安平鎮

中左右三營遊擊署在安平鎮

守備署在安平鎮

汎塘

設弁帶兵曰汛僅安兵者曰塘城內治兵宿守者曰堆凡南北汛塘不在邑轄者不具載

嶽帝廟堆在東安坊中營管 府衙邊堆在東安坊中營管 十字街堆

在郡城中屬鎮 關帝廟堆在西定坊左營管 枋橋頭堆在東安坊

右營開山宮堆 在西定坊右營管 塗壑埕塘在寧南坊城守

管 堆一塘俱在城內 每處各安兵五名

南砲臺塘在小西門外 瀨口塘在邑西南十 鹽水埔

沉在邑洽南十里設外 港岡塘在邑東南十 角帶圍

塘在邑東南十三 南安店塘在邑東南二十 狗崙崑

里安兵五名

青照堂叢書 三編 臺灣志畧二 五

塘在邑東南三十 猴洞口汛在邑治東三十五里設

名 鴈門關塘在邑治東五十 羅漢門汛在邑治東六

一員帶兵 四十四名 外門口汛在邑治東六十五里設外 土地

公嶺塘在邑東南六十 磅礮坑塘在邑東南七十 茂

公汛在邑治東三十五里設外委一員帶兵二

水仔尾塘在大西門外 北砲臺塘在小北門外 柴頭

港塘在邑治北五 小橋塘在邑東北五 蔦松塘在邑

十里安 兵七名 坎下塘在邑洽東五 大灣塘在邑洽東七 大

穆降汛在邑東北二十里設外 舊社汛在邑治東二

委一員帶兵二十名  
以上  
二汛七塘係城守右軍轄

安平鎮汛

在邑治西水程七里早程二十里臺協副將遊擊守備千把總駐劄防守安兵九百

八十一名總巡

鹿耳門汛

在邑西北水程二十五里全臺要衝中右二營遞年

輪防每年遊擊守備千總按季輪防帶中左各營兵各一百名

大港汛

在安平鎮西中營撥把總

一員帶兵五十名盤查出入貿易船隻兼轄鯤身頭茄藤仔喜樹仔等塘

鯤身頭塘

在安平鎮

西北沙汕喜樹仔塘

在邑西南十

茄藤仔塘

在安邑西南二

十里安兵五名

以上俱臺協轄

鎮標三營城守二軍教場在大北門外康熙三十八

年總鎮張玉麟建演武廳乾隆十六年總鎮李有用

青照堂叢書

三編

臺灣志畧二

六

增建後堂

俱有記

嘉慶十一年臺令薛志亮重修

臺協水師三營教場在安平鎮城南乾隆十四年協

鎮沈廷耀於演武廳後增建內堂一座計三間

船政

臺澎水師戰船初制分派通省廳員修造康熙三十

四年改歸內地州縣令其通省按糧議派臺屬三縣

亦在勺派之內後復改屬通省道府至康熙四十五

年乃令專屬臺灣道府復令福州府與臺灣府分修

而府之派船數倍與道旣而專責知府并道標船亦

歸於府焉雍正三年兩江總督查弼納題准設立總  
廠於通達江湖百貨聚集之所鳩工辦料較爲省便  
歲派遣員監督再派副將或叅將一員同監視焉部  
價不敷銀兩向來州縣協貼仍應如舊嗣經總督覺  
羅滿保會題將臺澎戰船九十八隻就臺灣設廠令  
臺灣道監修遂定爲例

屯番

番民以射獵爲生者也

化以來咸知向義林爽文之亂能以鏢鎗竹箭共禦

青照堂叢書

三編

臺灣志畧二

七

王事於是 大將軍公福康安奏請如四川屯練兵  
丁之例設屯駐劄給與荒埔田地使耕以食而免其  
租稅且其時清丈民墾之田多溢額亦并以予番縣  
官爲徵租折納歲給焉乾隆五十五年總督伍拉納  
巡撫徐嗣曾始以定議入奏

詔報可計全臺設大小屯凡一十二處番千總二員  
番把總四員每屯各設番外委一員大屯番兵四百  
人小屯番兵三百人邑無埔地而有屯番則割近邑  
荒埔以給之

邑轄小屯一所駐新港社番外委一員番兵三百人  
外委分給鳳山屬大北坪埔地三甲 新港社番  
兵二百零一名分給鳳山屬大北坪埔地二百四  
十四甲七分一釐六毫八絲益以南崁林口埔地  
九十四甲凡埔地三百三十八甲七分一釐六毫  
八絲 卓猴社番兵六十八名分給鳳山屬上淡  
社南坪頂埔地一百一十一甲四分五釐二毫  
大傑嶼社番兵三十一名分給鳳山屬南崁林口  
埔地五十二甲凡番兵三百名每名各分給埔地  
一甲六分有奇奇不等

青照堂叢書

三編

臺灣志畧二

八

兵燹

康熙三十五年

丙子

秋七月新港民吳球謀亂伏誅

六十年

辛丑

夏四月己酉南路賊翁飛虎等倡亂丁巳

敗官軍進逼府治五月辛酉朔總兵歐陽凱水師副

將許雲遊擊游崇功等戰歿府治陷甲子賊推朱一

貴爲首據府僭號庚午總督覺羅滿保自福州馳駐

廈門檄水師提督施世驄進剿以南灣總兵藍廷珍

統偏師佐之六月辛丑官兵集澎湖丙午入鹿耳門

遂復安平鎮壬子復府治賊衆逃散閏月丁卯獲一  
貴飛虎等械送京師磔之餘黨各正法

乾隆三十五年戊子秋九月大穆降庄奸民黃教謀亂

伏誅

乾隆五十一年丙午冬十有一月北路賊林爽文謀亂

陷彰化浚水諸羅南路賊莊大田應之陌鳳山五十

二年春正月提督黃仕簡任承恩引兵剿之弗克三

月

詔以兩湖總督常青江南提督藍元枚帥師剿賊賊

青照堂叢書

三編

臺灣志畧二

九

弗靖元枚卒於軍冬十月大學士陝甘總督嘉勇侯

福康安超勇侯海蘭察復奉

旨帥師剿賊五十三年春正月平之賊伏誅

嘉慶十年乙丑冬十一月二十四日海逆蔡牽由滬

尾入踞鹿耳門十二月二十四日浙閩水師提督李

長庚統舟師至鹿耳門困蔡牽十一年丙寅二月蔡

牽逸三月初一日廣東將軍賽冲阿自江西道奉

旨剿賊入城五月蔡牽再來復逸十三年戊辰以王

得祿提督浙閩水師十四年己巳八月十八日追擊

于黑水外洋蔡牽落海死

戎畧

姚啟聖號憂菴浙江紹興人漢軍籍康熙癸卯鄉薦  
第一初任香山知縣註誤去起爲台州郡佐陞溫處  
道丙辰爲福建布政使時耿逆初平海氛未靖啟聖  
每自備衣糧招募壯勇有澄清海外之志嘗曰國  
家聲教無外柰何以臺灣一彈丸使沿海居民不遑  
寧處厯宵旰憂會總督卽廷相罷去啟聖代之遂  
決計平臺歲己未移駐漳州漳與臺邇間謀可施乃

青照堂叢書

三編

臺灣志畧二

十

大開招來館以隨征參議道黃性震董其事來降者  
輒納之令福州同知蘇良嗣督造戰船委隨征同知  
林昇督糧運用人揆務洞中機宜旣數月賊降稍多  
悉厚犒之先是僞將軍朱天貴來歸啟聖知其驍勇  
熟海道特疏請天貴參軍事至則引入帳中相與臥  
起天貴感激竭誠効力遂增置火炮軍器買上游米  
石以圖大舉會蘇良嗣戰船報竣賊遣偵者數輩覬  
動靜啟聖故示以弛緩值元夕令百姓張燈自與文  
武大僚置酒還珠門樓上若無意用兵者漏下二鼓

來南曰此狀  
武襄三鼓奪

忽稱疾命屬吏行酒而啟聖已開南闕疾弛三百里至閩安鎮之五虎門親自配舟調遣精銳出師矣隨又赴漳使興化知府卞永譽泉州知府張仲舉往說賊降而僞行人傳爲霖雖約爲內應實心持兩端及爲霖見殺乃作急遽狀從數騎招搖城市見大屋輒扇之榜其門曰某鎮公館某將軍行臺各甚陳供具得賊偵則佯曰若非某將軍人乎歸語而主某日之期不可爽倍予酒食遣歸得他偵亦如之海上喧傳自相猜忌鄭氏心腹人人自危繼踵納款庚申春二

青照堂叢書

三編

臺灣志畧二

七

月癸未乘賊懈遣兵攻破陳洲馬洲觀音山石碼等十九寨甲申復遣隨征遊擊張定國都司張璽等引兵直抵海澄城下計招僞總兵蘇侃爲內應攻拔之降其衆二千二百六十七人遂復海澄是夜遣隨征知縣黃金從等乘潮分渡直入海門等處降其僞統領鄭元堂僞都督黃瑞僞將軍陳珍僞總兵張雄僞將軍張治等水陸兵一萬二千八百八十一人丁亥遂復金門廈門賊勢窮蹙退保澎湖二十年啟聖以軍中不可無帥具疏上請

天子命內大臣伯施琅爲水師提督既至相與籌兵料敵經畫方畧歲癸亥夏六月乙酉從銅山進兵癸巳克澎湖七月丙申鄭克塽率衆歸誠海外悉平啟聖制閩數載建議平臺獨握勝算一切文移條教悉出已手雖溽暑盛寒不倦談論指授英氣激發義形於色遇有功將弁及降將皆開誠獎勵捐金宴犒無少吝惜推功讓能勞謙不伐爲定謀推轂名臣第一朝命加啟聖宮保予世職凱旋後隨 題展海界遷民俾復井疆先是順治十八年令沿海居民遷界又置通省郡邑學田

青照堂叢書

三編

臺灣志畧二

七

供貧士膏火尋以病卒於官櫬出福省西郊時士庶填衢塞巷跪奠號泣立祠洪江澗肖像祀之

施琅號琢公普江人明崇禎時爲遊擊將軍及明亡

閩粵事亦相繼敗遂挈家入海依鄭氏成功忌其能

因費執之會得脫遁歸家屬皆被害順治丙申制府

李率泰薦授副總兵駐同安薄廈門賊壘屢擒其驍

將凡數十輩招降萬餘人晉同安總兵陞福建水師

提督削平金廈沿海諸島康熙六年以邊患宜靖疏

請平定臺灣得

項羽不用韓信卒以自滅

旨赴京面奏尋以議裁浙閩粵三省水師提督留京  
晉爵內大臣伯康熙二十年

朝廷從閩督姚啟聖請

特命仍以水師提督至閩選練舟師大舉征臺操演  
三載二十二年夏將乘南風進勦偽鎮國公劉國軒  
就臺簡精壯調佃丁計二萬餘人取洋船及偽文武  
等官私船改爲戰船大小二百餘號親統至澎湖於  
風櫃尾牛心灣等嶼鎮澎湖偽將林陞邱輝等約衆二  
萬集於雞籠與各島環列砲城沿海可登岸處概築

青照堂叢書

二編

臺灣志畧二

三

短牆分衆扼守六月己酉琅帥舟師由銅山開駕令  
各風颿大書將弁姓名以便識進退定賞罰丙戌到  
貓嶼花嶼是夜泊八罩水坂灣遣官乘小哨到將軍  
灣南天嶼等島安撫居民丁亥質明進攻澎湖賊列  
叵艘迎敵前鋒遊擊藍理會成等七船衝入賊艚副  
鋒千總鄧高等六船繼進焚殺過當值南潮正發諸  
船爲急流分散前鋒船追砲城賊舟兩翼合圍琅望  
藍理之颿見其深入自將坐駕船突圍赴援興化鎮  
吳英繼之焚斬僞將弁七十餘員圍解理傷砲還琅

亦集矢於目抵暮拋泊洋中翼日仍收泊八罩以甲  
裳裊首巖申軍令按失律罪諸將懼伏祈請立功自  
贖兵氣復振己丑取虎井桶盤嶼庚寅獨駕小舟潛  
偵賊砦還遂連日用老弱驕兵計假攻砦內及內外  
塹以分賊勢越癸巳集各鎮誓師分爲八隊每隊七  
船各三其壘自統一隊居中調度以八十餘船爲後  
援五十船從東畔砦內入鷄籠嶼爲奇兵夾攻五十  
船從西畔內塹入牛心灣爲疑兵牽制將戰有風自  
西北來滄浥蓬勃逆我師三軍股栗琅徇師大呼曰  
無畏惟天惟 皇帝之靈實式臨之須臾雷動立轉  
南颺潮水加漲四尺將士賈勇直向媽宮澳撲勦賊  
舟四面齊至火矢噴筒燔焰怒張我師乘勢奮擊自  
辰至申兵氣愈厲焚殺僞將曾瑞王順等四十七員  
僞協營弁目三百餘員賊夥萬二千有奇闕艦燒燬  
殆盡劉國軒急乘走舸從北面吼門逸去我師入駐  
澎湖澎水故苦鹹琅禱於神甘泉湧出澎湖旣定乃  
以恩信結臺人迎降將領弁目凡百六十五人賞以  
袍帽士卒四千八百五十三人給以銀米傷未及死

者六百餘人醫治之送還臺降者相謂曰是真生死而肉骨也歸相傳說賊衆解體引領望王師若時雨逆藩鄭克塽勢蹙決計歸順遣裨將馮錫珪陳夢煒齎獻延平王金印一招討大將軍金印一公侯伯將軍銀印五籍土地府庫軍實叩軍門乞降時七月二十七日丙申也八月壬子遂統舟師抵臺受降令劊髮撫輯兵民雞犬不驚市不易肆居數日乃刑牲奉幣告於成功之廟曰自同安侯成功父芝龍封同安侯入臺地始有居民迨賜姓明康王借號隆武賜成功姓朱啟土世爲巖疆

青照堂叢書

三編

臺灣志畧二

五

莫可誰何今某實賴天子威靈將帥之力克有茲土不辭滅國之愆所以忠朝廷而報父兄之職分也策某蚤歲於賜姓有魚水之歡中間微嫌釀成大戾某於賜姓剪爲讐敵情念疇昔蘆中窮士義所不爲公義私恩如是則已語畢涕下諸將士聞之皆感泣私語曰父仇也鄭公辛賢於伍員矣自是臺之官民毋敢有以私怨逞者提書至闕

上解所御龍袍馳賜載褒以詩因疏陳臺灣棄留利害周詳懇切請設郡縣防守爲東南數省藩籬禮遣

克瑛及諸將帥歸之京師 詔如所請海外悉平加授靖海將軍封靖海侯子世襲仍管福建水師提督事值歲凶平糶賑恤所全活百萬戶尋卒 賜謚襄

壯

吳英字爲高其先泉州人後入籍莆田康熙二年以平金厦功授都司甲寅耿夔時爲浙提左軍遊擊會寧海將軍視師問諸將誰可膺大任者提督首以名對遂授先鋒前後克復黃岩太平樂清青田象山等縣解處州圍破逆黨曾養性於溫州殲海寇張拱垣

青照堂叢書

三編

臺灣志畧二

其

朱飛熊於毛頭洋復收捕遂昌松陽等山寇水陸數十戰皆親冒矢石先士卒定謀制勝每獻捷功居首擢副戎任閩制府中軍值海氛未靖下游數警屢出奇兵敗賊於陳三泖觀音山江東橋所向披靡擢同安總戎隨率舟師復平金厦是歲列郡大饑馳請總督姚啟聖出示許沿海百姓出界採捕全活百萬尋移鎮興化適提督施琅疏平澎臺遂統陸師爲副誓衆登舟先抵八罩進剿之日前鋒深入幾爲賊窘自同提督駕船突圍援之而走已復領船奮勇前進焚

賊巨艦立克澎湖逆藩旣降駐師臺灣數月民不知  
兵臺人比之征西大帥凱旋入覲

溫旨褒嘉 賜鞍馬衣袍調浙舟山甫閱月擢四川  
提督凡十一年又以閩海巖疆授陸路提督未幾復  
調水師殫力經畫凡闕國計民生者無不悉力舉行  
後以年老乞休 賜

御書匾聯加威畧將軍尋又 賜詩存問年七十六  
卒於官贈太子少保

朱天貴莆田人平陽鎮總兵官康熙二十一年以總

青照堂叢書

三編

臺灣志畧二

七

督姚啟聖薦奉 旨調回閩省協平臺灣明年六月

二十二日攻克澎湖天貴率舟師奮勇追擊斬獲溺  
死者無算會中砲死總督上其功 詔贈太子少保

謚忠壯廕一子知州是時平臺立功者有海壇總兵

林賢金門總兵陳龍銅山總兵陳昌廈門總兵楊嘉

瑞副將蔣懋勛林葵詹六奇叅將羅士珍遊擊林瀚

王朝俊許毅張勝何應元曾成功吳輝趙邦試二等

侍衛吳啟爵筆帖式常在

覽羅滿保號島山滿洲人康熙甲戌進士五十年巡

撫福建綜煩治劇有幹濟才尋總制閩浙五十二年  
奉

命巡海復游塞置烟墩相度機宜綢繆孔固六十年  
臺匪朱一貴作亂滿保密疏告變謂撫臣呂猶龍曰  
廈門爲控制全臺咽喉當親往以安人心爲恢復計  
綏輯會城撥濟糧餉請以相屬五月庚午由省城疾  
趨泉州值澍雨連綿乘竹兜從數騎行泥淖中人莫  
知其爲制府也至廈門嚴申軍令市肆晏然時臺灣  
臺雨連月賊人坐困乃密募商船入臺爲偵多載魚

青照堂叢書

三編

臺灣志畧二

六

鯨賊喜得鯨酬以米粟又令魚舟托言遭風漂泊使  
壯士附船用竹筒貯告示蠟封之繫腰間至港輒從  
海底潛行登岸入府福掛諭鄉村市鎮有建 大清  
旗號者卽爲順民諸色人等有寫 大清二字貼縫  
衣帽者卽免誅戮由是各里紛紛遵辦以待 王師  
已而舟師雲集乃釃酒誓衆聲言分路進剿密授諸  
將錦囊戒以澎湖開洋後啟視則令其合攻鹿耳門  
蓋欲散賊黨以分其勢也賊果分兵拒戰旬日之內  
恢復府治南北二路以次討平捷聞隨調遣能吏安

韓流亡慰撫民番全臺底定後以疾卒於官

施世驃靖海將軍侯琅之子以外委守備隨父攻克澎湖立功累官至水師提督駐廈門康熙辛丑臺匪作亂世驃聞變集諸將議曰寇勢猖獗六七日全臺俱陷非小賊也今臺船數百艘逃入內地脫有奸徒混跡乘虛鼓煽厦島一搖不可制咎將誰執乃按兵觀釁而總督覺羅滿保羽檄飛促世驃出師赴澎湖以慰衆心迨滿保至厦門世驃已登舟出港兩日矣抵澎與南澳總兵藍廷珍謀克復安平復與廷珍遣青照堂叢書

三編

臺灣志畧二

五

將分搗郡城賊魁朱一貴等就擒卽於軍中疏平臺狀值南風正駛捷書到

闕 賜世驃東珠朝帽蟒袍異數有加時元寇雖擒餘黨散匿世驃復與廷珍分遣大兵廓清南北二路以除殘孽會風雨大作屋瓦皆飛人民震蕩世驃終夜露立疾作卒於軍

藍廷珍字荆璞閩之漳浦人少棄耕入伍習騎射戈盾趨捷如風鎗砲無虛發初爲把總洊陞溫州遊擊追海寇於外洋屢有奇功凡絕島險遠僻深官軍不

到之處莫不搜剔以覺羅制府薦擢南澳總兵官康熙辛丑夏朱一貴陷臺灣廷珍聞報卽簡徒治裝慨然以征陷爲己任貽書制府曰臺灣僻處海外狃於治安久矣朱一貴突爾跳梁戕害官兵竊踞郡縣雖曰猖獗之極其實不難平也無賴子弟偶爾烏合尙未知戰守紀律爲何事當卽命將出師星夜進討如救焚拯溺勿容稍緩彼不意官軍猝至必將手足忙亂倉皇散走渠魁大憝自可聚而殲旃此迅雷不及掩耳之道也若俟奏報請

青照堂叢書

三編

臺灣志畧二

千

旨而後發兵動逾數月賊胆必大規模漸立謀士漸出羽翮漸成則燎原之火正須大費撲滅耳控制臺灣惟廈門最爲扼要形勢所在便於指揮執事在省隔遠莫如疾驅南下住劄廈門督師進剿籌畫糧餉諸凡機宜呼應便捷且內地莠民不無乘虛鼓煽或謀嘯聚搖惑人心若檠戟一臨群疑自息執事曠世鴻才必有竒謀上計滅此朝食非鄙人所能窺測惟是養軍千日用在一朝

國家不吝爵祿施及下材未有毫毛小效補報萬一

敢以此疆彼界之殊非在職守之內袖手縮頭晏坐而旁觀哉願執事假某水陸萬軍舳艫三四百艘請乘長風破千里浪爲執事一鼓平之先是制府聞警卽以軍需糧餉屬諸巡撫呂猶龍而身從數騎疾趨廈門飛檄召廷珍至廈門共圖恢復事比行至塗嶺得廷珍書大喜曰藍總兵所見事事與吾臆合平臺得人矣廷珍會滿公於廈門定方略以廷珍統征臺大軍帶領將弁八十餘員兵壯八千餘人營哨商艘杉板頭艍仔諸舟四百餘隻以素所禮漳浦諸生陳青瑤堂叢書

三編

臺灣志畧二

三

此道名將多用之原從南書得來

夢林爲廷珍謀士使會提督施世驃於澎湖尅期進剿六月朔日舟出港颶風大作飄銅山十有一日抵澎湖廷珍言於世驃曰羣盜烏合易靡耳惟脇從至數萬不可勝誅毒生靈無益請張檄止殲巨魁他勿問則人人有生之樂無死之心可不血刃乎也世驃曰善十有八日戊申昧爽師克鹿耳門乘勝攻安平拔之戒將弁入郡之日毋許殺掠徧檄市里門書大清良民者勿誅於是人多爲自全計脇從皆散連日戰於鯤身瀨口塗墜洲仔尾皆捷十有九日賊大

攻安平以數萬衆擁牛車駕砲列盾爲陣大隊衝突  
而至廷珍親督大砲連環迸發倒翁飛虎烏龍旗遂  
破牛車陣由是賊退保府治不復出惟沿岸列砲晝  
夜固守我師往來攻擊勢相持越日有西港仔民持  
羊酒夜詣世驃營載妻子爲質願引大兵從西港仔  
登岸以出郡城之背世驃然之中密遣林亮董方輩  
以兵一千二百人往明日廷珍知之急見世驃曰此  
誠良策然必以全力乘之某間賊多在蕭壠麻豆間  
西港仔出其肘下且距府不遠呼召立應又多竹林

青照堂叢書

三編

臺灣志畧二

三

萬全之策

可埋伏彼若以數千人分布要害四面環擊林亮一  
軍殲矣故非大隊不濟世驃瞿然曰孰可任者廷珍  
曰此行他人不能某願當之公於此可分遣將備力  
攻瀨口土墾埕等處賊聞我師北來必棄營遁府治  
恢復在此兩日間耳從之於是廷珍留所部兵三分  
之一會攻府治自帥舟師五千五百人夜渡西港仔  
二十二日壬子黎明於竿寮鄉登岸卽下令來舟悉  
回安平諸將曰登岸棄舟何也曰示軍士必死無還  
心今日戰勝明日當抵府治耳言未竟謀者報賊在

蘇盾甲與林亮魏大猷輩決戰勢甚張廷琿乃分兵  
八隊以魏天錫金作礪葉應龍武舉倪洪範領兵千  
人疾繼林亮輩爲前鋒以林政李祖領千人爲左翼  
王萬化邊士偉領千人爲右翼復以胡璟劉永貴范  
國斗范崇勛分領千人爲左右奇兵以蘇明良領四  
百人爲後應呂瑞麟領七百人爲遊兵廷珍自與陳  
允陞陳章林君鄉周宣藍引沛何期有輩領精銳五  
百人爲中軍鼓行而進城黨林曹江國論黃殿林騫  
林璉等率衆來迎前軍奮力衝殺左右奇兵繞賊陣

青照堂叢書

三編

臺灣志畧二

五

後首尾夾擊遊兵突出竹林橫衝之中軍城闕而進  
鎗砲震天賊大潰追斬俘獲縱橫無算薄莫至犁頭  
標廷珍料賊必夜劫營下令撤帳捲旗露刃伏莽蔗  
中賊果至不見大營驚我軍突出擊之賊大敗走癸  
丑廷珍督大兵南下敗賊於木柵仔追至蔦松溪直  
搗臺郡朱一貴率羣賊遁去廷珍收復府治駐兵萬  
壽亭適世驃亦從七鯤身塗壘堦分路攻剿壬子夜  
駐南教塲是日與廷珍俱會府治出榜安民郡城平  
乃分遣大兵擴清南北路戊午大戰於大穆降賊衆

多降朱一貴走灣裡溪窮追至鉄線橋遂收鹹水港  
一貴走下加冬初漳人王仁和居臺灣往來於溝尾  
庄與庄民楊石楊旭楊雄善仁和謁廷珍廷珍善待  
之與以千總守備劄使招致楊石輩以計擒一貴聞  
六月甲子一貴走溝尾庄楊雄輩共縛之並擒其黨  
翁飛虎等數人而散其餘衆未久諸元寬多就獲南  
北路悉平其時臺鎮乏人以廷珍署總兵官秋七月  
餘孽江國論鄭元長復豎旗於阿猴林討平之江國  
論輩乞降廷珍善待之美衣食恣其出入以示諸未

擒者九月提督施世驍卒廷珍署提督事復招撫杜  
君英等數賊然其未靖者猶時萌孽其間故楊君林  
君等起於六加甸陳成蘇清楊美林阿尾王教等起  
於石壁寮皆收縛之立斬於市於是分檄諸將大興  
羅漢門盡獲其餘黨惟王忠邱寶宣遁入傀儡內山  
廷珍乃使外委鄭國佐林天成番通事章旺同入傀  
儡內山徧諭番衆勿竊留使國佐從瑯璫繞行山後  
至卑南覓檄諭諸番官勞以冠帶補服令起崇爻七  
十二社番壯大搜中工逸賊盡縛以獻由是王忠諸

賊不敢逸內山卒爲官吏所擒廷珍善緝捕雖逆黨  
有相率入海以遁者皆能計料其所之移檄捕之無  
有脫者冬十月奉

旨授福建水師提督加左都督予世襲生平忠勤勇  
敢用兵有法而爲人恂恂謙抑凡有計畫多不自用  
而善於用人愛才如渴將弁有賢者能者必引與同  
升而靡有德色初廷珍有從弟曰鼎元爲漳浦諸生  
與陳夢林同出儀封張中丞之門儀封倡明五子之  
學及門多賢士然語其實學實用殆無過二子者夢

青照堂叢書

三編

臺灣志畧二

五

林沉深多智而鼎元才尤伉爽明斷敏捷料時事洞  
如觀火廷珍總師征臺挈鼎元俱行凡軍中書檄露  
布盡出其手機謀計畫則夢林共襄之南北路旣平  
夢林歸餘孽作難幾一載軍中方畧多出鼎元廷珍  
每料敵發慮鼎元奮筆疾書動中機窾平臺事多賴  
之以高安朱相國薦授廣東普寧令改潮陽煩劇畢  
治決獄如神明然風持甚峻忤監司誣以贓奪職勘  
問二邑人遮道呼寃迺撫鄂公知其誣然以案成卒  
予罷職會鄂公總制閩浙以臺灣番民弗靖要與入

閩鼎元陳臺灣十事鄂公專摺舉鼎元之賢奉  
旨召見命爲廣州府知府到任甫兩月卒於官鼎元  
字玉霖夔林字少林

福康安號敬齋滿洲鑲黃旗人相國忠勇公第四子  
也幼從戎有奇績金川平論功封嘉勇侯遂以協辦  
大學士總督陝甘兩省乾隆五十一年林爽文倡亂  
提督黃仕簡任承恩討賊無功賊衆日滋蔓明年春  
詔以閩浙總督常青爲將軍代仕簡江南提督藍元  
枚爲叅贊代承恩藍至鹿仔港病卒常守郡城賊勢  
青照堂叢書  
三編  
臺灣志畧二  
庚  
久弗戢乃上書乞特簡重臣專討伐事八月有  
旨以嘉勇侯爲大將軍超勇侯海蘭察爲叅贊同領  
隊大臣普爾普舒亮四川將軍鄂輝統領巴圖魯侍  
衛一百二十餘人以楚蜀粵黔兵九千人赴臺灣勦  
賊侯至閩禮賢下士所至察民情諗地理抵泉州徵  
進士鄭光策舉人曾大源見於公邸二人徃見侯長  
揖不拜侯益尊重之詢以臺灣亂故光策首言上司  
好承奉守土官差事奢侈民生日賸削侯壯其說卽  
日撤行臺供具以納人言其時獻地圖言機事者甚

大將治戎率  
如此

賅侯皆納之乃定計集戰艦十月乙巳發大擔門退  
候風於崇武壬戌<sub>二十</sub>諸路軍畢集風色大利遂放  
洋下令針盤指鹿仔港而發癸亥舟集鹿仔港使舉  
人曾大源廈門監生陳文會職員楊振文輩登岸招  
撫難民露布告條數百紙令脇從罔治凡歸庄不助  
賊者給與盛世良民旗一桿凡庄有此旗者不加兵  
於是良民間風爭領旗不絕脇從多散時爽文方以  
賊黨守大里棧而自與眾賊悉力攻諸羅諸羅圍  
已五閱月民食草根豆蘆待命於呼吸爽文劄營牛  
稠山之上在諸羅北里侯下令搗賊巢大軍盡攻大  
里棧爽文思去牛稠山營北退二十餘里結寨於大  
埔林而分其黨救大里棧十有一月四日丁卯侯使  
海蘭察率巴圖魯攻彰化之八卦山而使額爾亨額  
色穆里雍中以降番伏於山下索倫阿木勒塔侍衛  
哲堯衝鋒上山海侯繼之鎗箭齊發賊奔山下竹圍  
中伏起降番急撲之散明日戊辰下令以舒亮爲前  
鋒取路北攻大里棧已巳侯率大軍南駐營於元長  
分兵五隊使海蘭察爲前鋒侯自率諸將繼之悉南

青照堂叢書

三編

臺灣志畧二

卷

行救諸羅幸未天初明爽支以衆賊禦我師於崙仔

頂此崙仔頂屬笨港非打  
貓北保之崙仔頂也竹圍蔗園中鎗砲迸發我

軍巍立不動海蘭察視賊所聚以馬隊衝之巴圖魯

輩箭無虛發當之者七八十步外皆著矢倒地賊如

出不意賊奔爽支身被創於是赫陣頭柴林脚西勢

潭仔泮厝三塊厝本廳天錫灰礮雙溪口大崙海豐

溝仔凡十數庄皆在笨  
港東南所至之處勢如破竹耆老持

露布出迎丁壯請從征者不可勝計遂直抵牛稠山

山爲爽支大寨衆數萬負山阻溪自固皆四面攻殺

青照堂叢書 三編 臺灣志略卷二 三

而來海侯率侍衛躍馬踰溪直衝賊陣所向披靡賊

衆大奔比昏海侯先入諸羅城侯復率衆將攻牛稠

庄台斗坑北社尾皆削平之比夜侯與大軍入於諸

羅柴大紀率衆官迎具言久困狀福海二侯取豆蘘

嚼於口咨嗟者久之諸羅民一時傳聞者皆下涕越

三日壬申賊衆數萬攻諸羅城之西北侯使海蘭察

以侍衛屯練兵五百人出飛鏃疾馳驟如風雨賊急

奔自相踐踏死者不計其數窮追至賊寨悉焚之使

民載其糧而歸癸酉初十日復西剿至大崙而將軍恒

瑞亦打通半天厝來會大崙與半天厝比連皆鹿仔  
草地於是諸羅西路始通諸羅圍既解爽文去大埔  
林而堅守於斗六門侯以近山賊巢連結必先勦除  
乃使海蘭察鄂輝普爾普與翼長六十七率巴圖魯  
東勦取路自十四甲而北侯自與將軍恒瑞總兵袁  
國瓚策其後大戰於興化店殺賊千數百人自興化  
店北至員林庄賊巢皆燬而舒亮前受策復自鹿仔  
港進軍伐竹仔脚中寮破大肚溪而南海口路既通  
乃使普爾普烏什哈達以千人南伐茅港尾與知府

青照堂叢書

三編

臺灣志畧二

元

楊廷理會剿中路廷理亦能軍且得民情不二日普

復拔營而北辛巳

十有八日

下令攻斗六門賊引數千人

迎截我師於馬稠後

此馬稠後在諸羅北門外山中蓋往斗六門舊路今已廢非南

門外之馬稠後也

擊敗之追至大竹排而還

按馬稠後大竹排皆舊路緣山

而行當日往斗六門皆由於此福侯由此進兵非利故引還而於二十日破大埔林而北則今之大路也

由此舊路遂廢

時爽文踞斗六門而使其黨南屯大埔林及

中林大埔尾復東屯菴古坑以爲聲援癸未侯率大

兵復攻斗六門乃分兵使恒瑞普吉保攻大埔林鄂

輝袁國瓚攻大埔尾海蘭察以巴圖魯攻中林侯自

帥師往來應援大破之數十里中積屍徧野日埔大軍會集於菴古坑坑爲蔡福巢穴濠柵深固力攻破

之明日甲申二十一日師迫斗六門賊踞隘口布阱阱削

竹筒埋之以陷馬足我軍行畝剛間四面攻之斬竹

圍入破其營爽文遁遂復斗六門西螺逆民來降侯

使同知黃嘉訓搜其黨乙酉大軍駐水沙連分勦虎

仔溪萬丹南投北投諸庄悉平之丁亥大軍至平臺

莊遂進攻大里枝大里枝高壘土城列巨砲內設木

柵兩層外溪礮重疊侯揮軍迫溪礮賊發巨砲侯親

躍馬先渡賊四出衝擊巴圖魯前賊不敢犯暮卽列

隊於溪礮旁比夜賊來攻隊我軍肅然無聲賊迫輒

殺之黑夜中殺賊無算明日戊午侯率諸將分兩路

夾攻之破其穴殺賊目林素林成林快江近許三江

陳傑輩二百餘人擒僞彰化縣劉懷青及張火蔣挺

林茂何從龍時爽文已挈妻孥越火燄山而遁乃剷

平大里枝獲大小鎗砲數百穀數千牛八百餘北路

文武關防印信皆收復十有二月丁酉攻集集埔破

之獲爽文父母與其妻若弟辛亥攻小半天又破之

二處皆堅壁絕險懸崖鳥道賊鑿石斷樹滅途徑謀  
死守者於是擒賊目林追林二林添孫東海王若敬  
爽文匿埔裏番社中侯乃指畫內山岐途仄徑凡一  
十五處皆令大將嚴兵守之而自與海蘭察窮搜亂  
山獠穴中誅擒逆賊六千餘人收其器械爽文自知  
不脫乃投於所善高振家曰吾使若富貴振縛之以  
獻遂卒獲爽文與其弟林躍賊黨何有志悉檻致京  
師時乾隆五十三年春正月四日也北路悉平侯乃  
下令南征十有四日丁丑侯使普爾普偕副將謝廷  
選取路內山僻徑直趨大武隴鄂輝取路海口由哆  
囉咽洗布陣搜勦而南特克什布偕遊擊葉有光亦  
沿山南進侯自率大軍趨中路以遊擊吳琇爲後勁  
戊寅駐灣裡溪己卯進攻牛莊擒賊陳獻瑞中路餘  
賊聞風大潰大穆降九社口本縣庄大武隴大埔十  
八重溪諸處賊悉平壬午侯率師抵南潭丁亥與賊  
戰於南仔坑大破之遂進復鳳山以副將伍達色留  
守有水底寮者居臺灣之極南負山面海地勢險遠  
南北路賊多竄焉侯使副將張芝元知府楊廷理往

招諭之賊恃險四出攻擊芝元廷理力戰焉明日戊子賊列陣於海岸以死相巨侯率海蘭察四路抄殺出奇兵橫衝擊之賊大敗奔入海中死者無數莊大田走琅璫琅璫內山十八社皆生番所居外則柴城諸處迨近海岸林菁叢深崎嶇輻輳二月五日戊戌侯令侍衛烏什哈達率師由海道進海蘭察鄂輝由山路進侯親統大兵至風港越菁穿林深入三十里賊從林中突出三路軍會合殲賊於林中遂獲大田及其弟大非其黨簡天德許光來許尙輩與大田母

青照堂叢書

三編

臺灣志畧二

三

妻子媳凡八百餘人生番縛賊三百餘人至盡殺之械大田至郡病亟瘞於市南路悉平是役也臺南北亘千餘里巨寇糾惡與脇從者衆且百萬巢穴纍結多在深林峻壑間有非人跡所易到者侯上乘

廟謨下稽衆論出謀制敵成算在胸計自丁未冬十

一月四日始用兵至戊申二月五日凡三閱月而南

北路蕩平窮山絕險無留奸羣寇無漏網水火倒懸

畢登衽席時雨之恩溢於海表蓋慮有必得而兵無

停機有如此也先是侯在北路燒賊庄患難民多失

才  
侯自天降將

所又東西螺投順以後降者日衆糧莠未分乃疏請  
派文員十餘人至臺撫卹又請以巡撫徐嗣曾來臺  
治諸一切

詔皆報可既平定俟復疏請於臺郡及諸羅建築城  
垣以番民爲屯兵語在城池屯番二志又以逆案抄  
沒田園租息增賞戎兵糧餉海防文武官索船戶例  
錢者悉加案核治其罪從軍打杖者悉奏加陞轉凡  
有微勞皆賞賚有差又審定善後事宜諸畢備

上皆如所請有

青照堂叢書

三編

臺灣志畧二

三

旨晉封公爵賞紅寶石頂四團龍補服黃帶紫韁  
詔立祠於臺灣

御製詩文紀其事焉

謝金鑾撰傳

叢談

宋朱文公登福州鼓山占地脈曰龍渡滄海五百年  
後海外當有百萬人之郡今歸入版圖年數適符熙  
熙穰穰竟成樂郊矣

朱子遠識自  
以理勢斷

明都督俞大猷討海寇林道乾戰敗艤舟打鼓  
山下恐復來追掠山下土番殺之取其血和灰以固

舟以航于海餘番走阿猴林社相傳道乾有妹埋金山上有竒花異果入山樵採者摘而啖之甘美殊甚若懷之以歸則迷失道雖識其處再往則失之

明崇禎庚辰閩僧貫一居鷺門

卽今廈門

夜坐見籬外陂

陀有光連三夕怪之因掘地得古磚背印兩圓花突起面刻古隸四行其文曰草鷄夜鳴長耳大尾千頭銜鼠拍水而起殺人如麻血成海水起年滅年六甲更好庚小熙皞太和千紀凡四十字閩縣陳衍盤生明末著槎上老舌一書備記其事至

青照堂叢書

三編

臺灣志畧二

番

國朝癸亥四十四年矣識者曰鷄酉字也加草頭大尾長耳鄭字也千頭甲字鼠子字也謂鄭芝龍以天啟甲子起海中爲羣盜也明年甲子距前甲子六十年矣庚小熙皞寓年號也前年萬正色克復金門廈門今年施琅克澎湖鄭克塽上表乞降臺灣悉平六十年海氛一朝盪滌此固

國家靈長之福而天數已預定矣異哉

臺灣土番種類各異有土產者有自海舶飄來及宋時零丁洋之敗遁亡至此者聚衆以居男女分配故

番語處處不同

鄭成功起兵猖獗有僧識其前因語人曰此東海大鯨也問何時而滅僧曰歸東卽滅矣凡成功兵到處海水皆暴漲順治辛丑攻臺灣紅毛先覓見一人冠帶騎鯨從鹿耳門入未幾成功突至紅毛遂遁明年五月其轄下人復覓一鯨魚冠帶乘馬由鯤身出海外而成功遽卒正應歸東卽滅之語異哉

荷蘭爲鄭成功所敗地大震鄭克塽滅地亦震朱一貴于辛丑作亂庚子十月亦地震雜時南路傀儡山裂其石截然如刀割狀諸羅山頽其巔噴沙如血土人謂兩山相戰

一元子玉帶流傳民間且久玉版凡二十枚碾成百鹿良玉善工足寶也

郡人譚藝者必推沈斯菴往歲范九池侍御修郡志採其詩文入志者甚多頽唐之作連篇累牘殊欠持擇也考斯菴名光文字文開鄞人明副榜由工部郎中晉太僕寺少卿命監軍廣東順治辛卯自潮州航海至金門總督李率泰陰招之不赴將入泉州舟過

圍頭洋遇風飄至臺灣鄭成功禮以賓客不署官及  
經嗣以賦寓諷幾罹不測遂憂服爲僧入山臺平不  
能歸因家焉意此君官唐桂藩事敗渡海依鄭氏者  
觀其序東吟社稿有云鄭延平視同田島志效扶餘  
可想見已他如王忠孝辜朝薦沈佺期盧若騰李茂  
春張士郁張灝張瀛輩均以故紳遯跡島嶼者志家  
列諸此郡流寓論其世原其志可耳

南北路任載及人乘者均用牛車編竹爲箱名曰笨  
車輪圍以木板板心鑿孔橫貫堅木無輪與輻之別

青照堂叢書

三編

臺灣志畧二

五

蓋臺地雨後潦水停塗有輻輳障水難行不如木板  
便利也車轍縱橫衢市聞音脆薄如哀如訴侵曉夢  
回時尤不耐聽

使槎錄云郡中馱舌鳥語全不可曉如劉呼撈陳呼  
淡莊呼曾張呼丟吳呼襖黃無音厄影切更爲難省  
小流求志云臺地字多意造爲字書所不載如番槎  
之槎字泥鱸之鱸字管猿之猿字啲乳酒之啲字茄  
老網之老字颺風之颺字獸善走爲跳之跳字不一  
而足尤難枚舉愚謂形聲舛異此類尙多二書特舉

其概耳

海外晝日視中土較長蓋迤西巨瀛無際陽曦無有蔽虧故也有謂男女暴長年十四五卽如中土年二十許且有男九女十之諺以爲地居東方生發氣盛所致未必盡然

臺地多用宋錢如太平元祐天禧至道等年號錢質

今聞其多用

洋錢

小薄千錢貫之長不盈尺重不逾二劬相傳初闢時土中有掘出古錢千百甕者或云來自東粵海舶嘗往北路家僮於笨港口海泥中得錢數百肉好深翠

青照堂叢書

三編

臺灣志畧二

三

古色竒玩乃知從前五市未必不取道此間果竟觀與世絕哉然邇來中土不行小錢洋舶亦多有載至者

武林郁滄浪撰僞鄭逸事頗詳核長耳草雞後先竊踞一甲子中木末具在雖不足爲海外故實然禹鼎鑄其神姦楚史號爲擣杓要亦鑒古者所不愍置也臺灣人稱內地曰唐山內地人曰唐人猶西北塞外稱中土人曰漢人蓋塞外通於漠海外通於唐名稱相沿其來久矣至土人呼府城爲仙府鄉村爲草地

則闢郡始有此稱

青照堂叢書

三編

臺灣志畧二

三

07183

闕里縣志



11

